

Xojon carta-la San Pablo xi kiskii-la xita naxandá-la Cristo xi títsajna Roma

*Kó tsò Pablo nga síhixat'aà jñà xita naxandá-la
Cristo xi títsajna Roma*

¹ Jè xojon carta jè, 'aán tikjiì-nò xi Pablo 'mì-na xi chī'nda-la Jesucristo ma, xi xó kiìchja-na Nainá nga 'an tsibíxáya-na kò xó kitjaàjiin-na nga 'an sika'bísoàn 'én ndaà-la Nainá.

² It'aà ts'e 'én koi, Nainá jye k'oas'ín kitsjaà tso'ba nga tisa kjòtseé, koni s'ín tíchja Xojon Tsjeè-la xi kiskii xita xi kiìchja ngajo-la Nainá. ³ Nga ya tíchja it'aà ts'e Ki'ndí-la, jè Nà'èn-ná Jesucristo xi jè otíxoma-ná. Koni xita isò'nde, yaá inchrobàt'aà-ne tje-la xitaxá ítjòn David. ⁴ K'e nga jaáya-la it'aà ts'e kjoabiyaà, Jesucristo, k'oáá s'ín kiyaxkon-la nga Ki'ndí-la Nainá-né xi tse nga'ño tjin-la koni s'ín ndaà síkichiya-ná jè Iníma Tsjeè-la Nainá xi sítsjeè-ná. ⁵ It'aà ts'e Jesucristo, kitjoé-na kjondaà nga 'an tsibíxáya-na nga kènojmíya-la 'én ndaà-la jñà xita naxandá xi tjin nga títsa isò'nde nga kàtasíkitasòn kò kàtakjeiín-la it'aà ts'e Cristo, mé-ne nga jeya kína-ne Cristo. ⁶ Tíkooá jñò, xó kinokjoà-nò nga xita-la Cristo k'oín-nò.

⁷ Tikjiì-nò ngats'ioò xi títsajnaà Roma xi mats-jakeè-nò Nainá nga tíkoa xó kinokjoà-nò nga xita tsjeè-la koma.

Nainá xi Na'èn-ná, kò jè Jesucristo xi otíxoma-ná kàtatsjá-nò kjòndaà kò kjoa'nchán ya jjiìn inìma-nò.

Mé-ne mejèn-la kjoì Roma jè Pablo

⁸ Xi mats'ia-ne, it'aà ts'e Jesucristo tsjaà-la kjòndaà Nainá xi it'aà tsajòn, koi kjoa-la nga xkì xi ján naxandá xi tjín nga títsa isò'nde, na'yá-nò nga ndaà mokjeiín-nò it'aà ts'e Cristo. ⁹ It'aà ts'e Nainá xi 'an sìxá-la nga tíjngoò takoàn nga sika'biá 'én ndaà-la xi kjoa ts'e Ki'ndí-la, jè tíbeè nga nachrjein nchijòn síkítsjeèn-nò k'e nga chjàt'aà-la. ¹⁰ K'e nga bìtsi'ba-la Nainá, k'oaá s'ín síjèt'aà-la tsà ikon xi tsò nga chaán tsjá'nde-na nga kjíkon-nò. ¹¹ Tíkooá mejèn-na skoexkon-nò mé-ne nga tsja chiba-nò kjohítsjeèn ts'e inìma-ná mé-ne nga ìsa kixi kítsajna-nò. ¹² Jè xi tìxan-nò nga ngàsòn k'oi-lá nga'ño xinguiáá it'aà ts'e kjoa xi mokjeiín-ná.

¹³ 'Ndsè, tichja, mejèn-na nga kàtasijiìn-nò nga kjòtseé tjín-ne nga kjíkon-nò tanga skanda i'ndeì mì tà jngoò kjoa bíchjoà ikòn-na. Xi kjohítsjeèn ts'an, jè xi mejèn-na nga sìxáko-nò jño, koni s'ín kisìxá ñánda nga xìn naxandá mé-ne nga tìkoa skoeè-na kjòndaà-la xá-na xi 'an s'iaàn it'aà tsajòn. ¹⁴ Tjínè-na nga kokoòya-la ngats'iì xita xi 'én griego chja kò xi mìkì chja, xita xi tjín-la kjoachjine kò xi tsjìn-la. ¹⁵ K'oaá ma-ne nga 'ño mejèn-na nga tìkoa kichjàyajiìn-nò jè 'én ndaà-la Nainá xi kjoa ts'e Cristo, jño xi tìtsajnaà naxandá Roma.

Mé nga'ño xi tjín-la 'én ndaà-la Nainá xi kjoa ts'e Cristo

¹⁶ Mìkì masobà-na it'aà ts'e 'én ndaà-la Nainá xi kjoa ts'e Cristo, nga nga'ño-lá Nainá-né. Jè 'én xi

ma-la síkítsaj̄nandeí̄ x̄ita kjoa ts'e jé, ngats'iì x̄ita xi mokjeiín-la ìt'aà ts'e, mats'iāko-ne jñà xi x̄ita judío ko t̄ikoa xi mìtsà x̄ita judío. ¹⁷ Jñà 'én ndaà-la Nainá xi kjoa ts'e Cristo okó-ná kós'ín s'ín Nainá nga síkixi x̄ita. Tà jè-né nga mokjeiín-la ìt'aà ts'e Cristo mé-ne nga is̄a ndaà k̄okjeiín-la. K'oaá s'ín tíchja Xojon-la Nainá nga tsò: “Jè xi x̄ita kixi, ìt'aà ts'e kjoa xi mokjeiín-la kíjnakon-ne.”

Jé xi t̄jín-la x̄ita isò'nde

¹⁸ Nga jè Nainá skanda ján ngajmii tíhokó kjoajti-la ìt'aà ts'e x̄ita xi mìkiì beèxkón ko xi ch'o s'ín. Jè kjohítsjeèn ch'o xi t̄jín-la mì kì tsjá'nde-la nga kjoétjò xi kjoakixi. ¹⁹ Jè kjoa xi 'ya-la ìt'aà ts'e Nainá, ndaà t̄jiín-la jñà x̄ita koi, nga t̄jè-ne Nainá tíhokó-ne. ²⁰ Nga jñà kjoa ts'e Nainá xi mìkiì tsejèn, ndaà t̄iyaxkon-la kóni nga t̄isa kisindaà isò'nde. Yaxkoón-la nga t̄jín-la nga'ñó Nainá n̄ita mé n̄achrjein-ne nga tà jè t̄ajngoò xi Nainá 'mì. Kjoa koi tí'yaá-la ìt'aà ts'e tsojmì xi tsibíndaà Nainá. K'oaá ma-ne nga jñà x̄ita mì kì koma k̄inchako yijo-la nga k̄itso: “Mìkiì t̄jiín-na tsà t̄jna Nainá.” ²¹ Jñà x̄ita nas'ín t̄jiín-la nga t̄jín Nainá xi tsibíndaà isò'nde, t̄anga mìkiì jeya k̄isikíjna, n̄i mìkiì kitsjaà-la kjondaà. T̄a saá tà koií 'ñó ndaà k̄isís'in-la kjohítsjeèn xi n̄imé ch̄jì-la. Kjohítsjeèn tájaà-la k̄isijñò-la. ²² Xi kjohítsjeèn ts'e, x̄ita ch̄jineé kitsò-la yijo-la; t̄anga mìtsà kixi kjoa, x̄ita n̄chikón-né. ²³ K̄isikíjnat'aàxìn Nainá xi jeya t̄jna xi mìkiì fehèt'aà n̄achrjein-la; t̄a saá koi k̄ijtseèxkón isén ts'e x̄ita xi fehèt'aà n̄achrjein-la; skanda jñà isén-la ch̄o xi t̄jímajiín isén k̄ijtseèxkón, ko isén-la ch̄o xi ñjòn ma ndsoko ko isén-la ye.

24 Koií kjoa-la nga kitsjeiín takòn Nainá nga taxkí kàtas'ín nga kàtas'ín nita mé kjoa chinga xi bitjokàjiín inima-la. K'oaá ma-ne nga tsohótsji-la kjoa sobà yijo-la koni s'ín kisikò xíkjin. 25 Kisikjatjiaá-la kjoa kixi-la Nainá; 'én ndiso kiskoé. Jñà kijtseèxkón koa jñà kisitsjako tsojmì xi jè Nainá tsibíndaà. Mitsà jè kijtseèxkón koa kisitsjako Nainá xi tsibíndaà tsojmì. Nainá kàtayaxkón nita mé nàchrjein-ne, k'oas'ín kàtama.

26 Koií kjoa-la nga kitsjeiín takòn Nainá nga kò s'ín kàtas'ín-kò yijo-la kjoa sobà xi ch'o tjín. Jñà íchjín kisikjatjiaá-la koni s'ín mochjeén x'in; tjín íchjín xi tijnà xíkjin kiskoé-ne. 27 K'oaá tis'ín kis'iín íchjá, kitsjeiín takòn-né koni s'ín mochjeén íchjín. Tjín íchjá xi 'ño kisaseèn-la nga ti x'in xíkjin tsoyijòko-ne. Tsohótsji-la kjoa sobà yijo-la. K'oaá ma-ne nga kjo'in kis'e-la xi ti yijo ts'e-ne koni s'ín ok'in-la kjoa ch'o xi kis'iín.

28 Xita koi, mìkiì kisikítsjeèn tsà mochjeén-né nga skoexkon Nainá; k'oaá ma-ne nga kitsjeiín takòn Nainá nga kàtasíkjeén kjohítsjeèn-la xi nì méé chjí-la mé-ne nga k'oas'ín kàtas'ín-ne kjoa xi mìkiì ok'in-la. 29 Xita koi, yaá tjíjiín yije inima-la ngats'iì kjoa xi ch'o tjín koni: kjoa chijngui, kjoa ts'en, kjoa tse mejèn, kjoa toòn, kjoaxitakòn, kjoa nga ma-la sík'en xita, kjoa xi kjaán-kjoò, kjoa konachan, kjoa xi ch'o s'ín, kjoa 'én ndiso; 30 nga chjajno-la xíkjin; nga síjtikeè Nainá; ochrjengui xíkjin; 'nga ikon; ndaà síkijna yijo-la; síkítsjeèn nga mejèn-la isa ch'o tjín kjoa xi s'iín; mìkiì 'nchréñijon-la xita jchínga-la; 31 mìkiì machiya-la; mìkiì síkitasòn 'én xi chja; mìkiì beètjò xita xíkjin; tsjìn-la kjoa nìjchàat'aà; koa

tsjìn-la kjoahimatakòn. ³² Jñà xità koi, ndaà tíjìn-la nga k'oaá s'ín tsjá okixi Nainá: ngats'iì xi k'oa tjin kjoa xi s'ín, ok'ín-la nga kiyá. Tanga mìkì majngoò ikon nga tà jñà xi k'oas'ín, skanda tikoáá matsja-la k'e nga k'oa tìs'ín xità xi kj'eìi.

2

Nainá, mé xi tsjá-la xità xi ndaà s'ín kò xi ch'o s'ín

¹ K'oaá ma-ne, ngaji, nità yá xità-ne ji, nga jé onè-la xinguii, mìkì koma kosikoi yijo-lè nga nguixkon Nainá. K'e nga jé tìbìnè-la xità xinguii, tikoáá ngaji, tiji tìbìnè-la jé yijo-lè nga k'oa tìs'ín 'nì. ² Tanga 'ya-ná nga kixi s'ín Nainá k'e nga tsjá-la kjo'in jñà xità xi koa tjin jé xi ótsji. ³ Ngaji xi kjo'in bìnè-la xità xi kj'eìi, ¿mé-ne koa s'ín nìkìtsjeèn-ne nga jchat'aà-lè kjo'in xi tsjá Nainá? Nga ji k'oaá tìs'ín 'nì. ⁴ ¿A mì tíjìn-lè nga nachrjekàngui jè kjondaà-la Nainá nga tjin-la kjojetakòn koa tjin-la kjoatsejta? ¿A mì tíjìn-lè nga jè kjondaà-la Nainá tíkoña-né nga s'ikájnoi jé-lè nga mì tì jé kinchátsji-ne? ⁵ Nga tájaàjìn tjin inima-lè nga mìkì nìkájnoi jé-lè, isaá tse kjo'in tìbìnè-la yijo-lè xi tsjá-lè Nainá jè nachrjein k'e nga kjoíko kjoajti-la nga jcha-la kós'ín kixi koìndaàjìn Nainá nga tsjá-la kjo'in jñà xità. ⁶ Nainá tsjá-la chjì-la mé kjoa xi kis'ìn nga jngoò ìjngoò xità. ⁷ Tsjá-la kjoabinachon nità mé nachrjein-ne jñà xità xi nchihótsji kjoajeya, kò nchihótsji nga jchaxkón, kò nchihótsji nga kìtsajnakon nità mé nachrjein-ne ján ngajmì. Koi kjoa-la nga ndaà tjin kjoa xi nchis'ín nga kjit'aà nachrjein. ⁸ Tanga Nainá nga kò kjoajti-la tsjá-la kjo'in jñà xità xi kondra fì-la

nga mìkiì 'nchréñijon xi kjoa kixi. Tà kjoa nchikón fitjingui-la. ⁹ Tsee kjoa s'e-la kò tsee kjo'in s'e-la ngats'iì xita xi ch'o s'in, mats'ia_{ko} ítjòn-ne jña xita judío, tiko_{aa} kò xi taxki xita xi mitsà xita judío. ¹⁰ Tanga jña xita xi ndaà s'in, tjoé-la kjoajeya, ndaà jchaxkón, tiko_{aa} s'eé-la kjoa'nchán inima-la, mats'ia_{ko} ítjòn-ne jña xita judío, tiko_{aa} kò xi taxki xita xi mitsà xita judío.

¹¹ Nainá mìkiì faájiin nita yá xita-ne, tà ngàsòn fikò yije. ¹² Ngats'iì jña xita xi mìkiì tíjiin-la kó tsò kjotíxoma xi kiskìi Moisés, k'e nga jé ótsji, chija-né nas'in mìkiì kijtsee kjotíxoma-la Moisés. Ko_a jña xita xi ndaà tíjiin-la kjotíxoma-la Moisés, k'e nga jé ótsji, k'o_{aa} s'in kojtsò koni s'in tíchja xi tijè-ne kjotíxoma. ¹³ Jña xita xi tà 'nchré-la kjotíxoma xi kiskìi Moisés, mitsà jña xi xita kixi nga nguixkon Nainá. Jña-né xi xita kixi xi sikitasòn. ¹⁴ K'e nga jña xi taxki xita xi mìkiì tíjiin-la kós'in tíchja kjotíxoma-la Moisés, sà k'o_{aa} tà yaá nchrobájiin inima-la nga k'oas'in s'in koni tsò kjotíxoma-la Moisés, yaá 'ya-la nga tiko_a tíjiin inima-la kjotíxoma xi ts'e nas'in tsjin-la ts'e Moisés. ¹⁵ K'e nga ndaà s'in yaá 'ya-la nga tíjiin inima-la kjoa xi síjé kjotíxoma-la Moisés; jè inima-la okó kjoa xi ndaà tjín kò xi mìkiì ndaà tjín; tijè-ne kjohítsjeen-la sà k'o_{aa} óngui kò sà k'o_{aa} osìkò. ¹⁶ K'o_{aa} s'in koma jè naxhrjein k'e nga Nainá kojindaàjiin ngats'iì jé xi tíj'ma-la xita jiin inima-la; it'aà ts'e Jesucristo sindaàjiin, koni tsò 'én ndaà-la Nainá xi kjoa ts'e Cristo xi 'an chjàya.

¹⁷ Ngaji xi xita judío 'mì-lè; jè ma'ñót'aà takoìn kjotíxoma xi kiskìi Moisés; 'ngaá ma takoìn it'aà

ts'e Nainá nga si tsiji-né; ¹⁸ 'ya-né mé xi mejèn-la Nainá nga sikitasoìn; ma-lè chjaàjiìn mé kjoa xi nguì ndaà tjín koni s'ín okóya-lè Kjotíxoma; ¹⁹ k'oaá s'ín níkítsjiìn nga tíjngòò takòin nga ji okoò-la ndiyá kixi xita xi mikiì machiya-la nga tíchjoà xkon kò k'oaá ma-lè nga ji nìhiseèn-la xi tjíjñò kjohítsjeèn-la. ²⁰ Ji, k'oaá s'ín níkítsjiìn nga ma-lè okoòya-la xi taxki xita xi tsjin-la kjohítsjeèn; nga maestro 'mì-lè ts'e xita xi chiba ma-la it'aà ts'e Nainá; nga tjín-lè kjoa chjine kò kjoa kixi xi okó-lè it'aà ts'e Kjotíxoma. ²¹ Ji xi ma-lè okoòya-la xita xi k'jeíí, ¿mé-ne mikiì okoòya-la xi tì yijo tsiji-ne? Ji k'oaá s'ín nokjoàyi nga mikiì ma sìchijé; ji, ¿mé-ne nìchijé-ne? ²² Ji, k'oaá si nga mikiì ndaà tjín nga kjoa chijngui s'jin xita; ji, ¿mé-ne nga k'oa tìs'ín 'nè-ne? Ji, k'oaá si nga jtichii xkósòn; ¿mé-ne nga ingò bitjaàs'en-ne nga nìchijí tsojmì-la xkósòn? ²³ Ji, 'ngaà takòin nga ndaà tjíin-lè kjoa ts'e kjotíxoma tanga, ¿a mìtsà tìnachrjekàngui Nainá nga mikiì níkitasòn-la koni s'ín tíchja kjotíxoma? ²⁴ K'oaá s'ín tíchja Xojon-la Nainá nga tsò: “Kjoa tsajòn-nò xi xita judío 'mì-nò nga chjajno-la Nainá jñà xi taxki xita.”

²⁵ Tsà ndaà sikitasoìn kjotíxoma xi kiskii Moisés, jè kjoa ts'e circuncisión nga tjit'aà chiba-lè, chjí-la-né; tanga tsà mikiì sikitasoìn, k'oaá ngaya-la koni tsà mikiì tjit'aà chiba-lè. ²⁶ Jñà xi mìtsà xita judío, nas'ín mikiì tjit'aà chiba-la koni xita judío, tanga tsà kixi síkitasòn kjotíxoma ts'e Moisés, Nainá skoétjò-né koni tsà tjit'aà chiba-la. ²⁷ Jñà xita xi síkitasòn kjotíxoma ts'e Moisés, nas'ín mikiì tjit'aà chiba-la yijo-la, jñà koiindaàjiìn-nò nga mikiì níkitasòn nas'ín tjit'aà chiba-nò, nas'ín tjín-nò

xojon ts'e kjotíxoma-la Nainá. ²⁸ Jngoò xi xita judío, mitsà tà jè nga ndaà 'ya-la kjoa xi s'ín; koa jngoò xita xi tjit'aà chiba-la kjoa ts'e circuncisión, mitsà tà jè xi mochjeén nga tjit'aà chiba-la isò'nga yijo-la. ²⁹ Jè xi nguì xita judío, jè xi chji-la koni s'ín tjín ijìn inima-la. Kò jè xi nguì tjit'aà chiba-la, jè xi chji-la koni s'ín tjit'aà chiba-la ya ijìn inima-la. Kjoa koi, mitsà ts'e kjotíxoma xi xojon tjit'aà; ts'eé Inima Tsjeè-la Nainá. Jñà xi k'oas'ín síkitasòn, Nainá ndaà chja xi it'aà ts'e, nas'ín mìkiì ndaà chja xita xi kj'eji.

3

Mé kjoa xi 'ñó chji-la it'aà ts'e xita judío

¹ Tsà k'oaá s'ín tjín, ¿mé kjondaà xi isa tse tjín-la nga xita judío 'mì? Kò ¿mé chji-la nga tjit'aà chiba-la? ² Kjìn skoya chji-la. Jè xi tjina ítjòn, jè-né nga jñà xita judío kjòngatsja 'én-la Nainá. ³ Jñà xita judío, nas'ín tjín i'nga xi mìkiì síkitasòn 'én xi kjòngatsja, ¿a koma sikjatjìya-la kjoakixi-la Nainá nga mìkiì kitasòn koni s'ín kitsjaà tso'ba? ⁴ Majìn, mìkiì koma. Nainá, xita kixi-né, nas'ín xita ndiso ngats'ìi xita xi tjín isò'nde; koni s'ín tichja xojon nga tsò:

Mé-ne nga kàta'ya-la nga kixi kjoa 'én xi nokjoi sikijne-né k'e nga yá xi qohòngui-lè.

⁵ Tjín i'nga xita xi tsò: K'e nga ch'o 'nè, isaá ndaà 'ya-la kjoakixi-la Nainá. Tsà k'oas'ín tjín, ¿kó kixoán? ¿A kixón-ná nga mì kjoa kixi tís'ín Nainá nga kjo'in tsjá-ná? (Tsà kòs'ín kixoán, jngoò kjohítsjeèn-la xi taxkì xita titsanìkjeén.) ⁶ Tanga majìn, mì k'oaá s'ín tjín. Tsà mitsà kixi s'ín Nainá

nga kjo'in tsjá-ná, ¿kós'ín koma koiindaàjìin-la xita isò'nde?

⁷ Tikoáá tsà k'oa kitsò xita koi: “Tanga tsà kjoandiso-na okó nga jè kjoa kixi-la Nainá isa jeya kína, ¿mé-ne k'oas'ín tísìnè-na nga xita jé tityatakòn-na?” ⁸ Tikoáá-ne ch'o s'eén mé-ne nga kátasakó-isa-ná kjondaà-la Nainá. Tjín xita xi kotsò nga k'oaá tjín 'én xi okoòya; jè xi mejèn-la nga ch'o síkíjna-na. Jña xita xi kotsò, ok'ín-la nga tjoé-la kjo'in xi Nainá tsjá.

Mé jé xi tjín-la ngats'ìi xita

⁹ ¿Kó s'ín nìkìtsjeèn? Jña xi xita judío 'mì-ná, ¿a isaá ndaà xitaá koni jña xita xi kj'eí? Majìn, jyeé k'oaá kixan-nò, tà ngàsòn jé titsajnajñaá ngats'iaá xi xita judío 'mì-ná kò xi taxkì xita. ¹⁰ Koni s'ín tíchja Xojon-la Nainá nga tsò:

Nijngoò xita tjín xi xita kixi, nì tsà tà jngoò.

¹¹ Nijngoò tjín xi machiya-la,

nijngoò tjín xi ótsji Nainá.

¹² Ngats'ìi xita, saá xìn ndiyá kii; ngats'ìi nímée chjí-la kjoa xi s'ín;

nijngoò xi ndaà s'ín, nì tsà tà jngoò.

¹³ Naxájt-la, k'oaá kjoàn koni ngajo-la mik'en k'e nga táx'ajto;

nijen-la nguì 'én ndisoó chja;

'én xi chja, k'oaá ngaya-la koni tsà xán-la yé.

¹⁴ Chjajno-la xita kò nguì koi 'én chja xi 'on ma-la inima-ná.

¹⁵ Mikìi koña kjoa, nitoón sík'en xita.

¹⁶ Nita ñánda nga fì, síhima kò síkjehesko xita xi kj'eí.

¹⁷ Mikìi beèxkon ndiyá ñánda tjín kjoa'nchán.

18 Mikiì tsakjón-keè Nainá ìt'aà ts'e kjoa xi s'ín.

19 Jyee 'yaá nga ngats'ìì 'én xi tjit'aà kjotíxoma ts'e Moisés, jñá chja-là ngats'ìì xita xi ya fit'aà-là, mé-ne nga ngats'ìì xita, mikiì koma kichja nga kinchako yijo-là nga nguixkon Nainá; ngats'ìì xita xi tjín isò'nde koìindaàjìln-là Nainá nga jcha-là nga jé tjín-là. 20 Njingoò xita xi kixi kína nga nguixkon Nainá tà koi kjoa-là nga ndaà tísíkitasòn Kjotíxoma ts'e Moisés. Nga jé Kjotíxoma, tà k'oaá s'ín mochjeén nga bénojmiya-ná nga jé tjín-ná.

Kó síko-ná Nainá nga kixi kitsajnaá nguixkon jè

21 Tanga i'ndeì, Nainá okó-ná kós'ín s'ín Nainá nga xita kixi beètakòn-ná. Kò mìtsà kjoa ts'e Kjotíxoma nga bitasòn. Jñà xojoñ jchínga ts'e kjotíxoma-là Nainá kò ts'e xita xi kichja ngajo-là Nainá k'oaá tìs'ín bénojmiya-ná, 22 nga jñà xita k'e nga mokjeiín-là ìt'aà ts'e Cristo, kixi bìtsajna nguixkon Nainá. K'oaá s'ín síko yije kóhotjín xi mokjeiín-là. Nga ngats'ìì xita ngàsòn jé tjín-là, 23 nga ngàsòn ótsji jé-né; kjiìln títsajnat'aàxìn-là Nainá ñánda nga jeya tíjna. 24 Tanga Nainá, nga ndaà xita, kitsjaà kjotjò-ná kjondaà-là mé-ne nga kixi kitsajnaá nguixkon jè. Jè Jesucristo tsibíchjítjì ngajo-ná jé-ná mé-ne nga kitsajnandejì-ná xi kjoa ts'e jé. 25 Nainá kitsjaà ki'ndí-là koni jngoò kjotjò xi faáxìn jé-ná nga nguixkon Nainá k'e nga mokjeiín-ná ìt'aà ts'e Jesucristo, nga jé tsibíxteèn jní-là k'e nga k'en. Nainá k'oaá s'ín okóya-ná kós'ín tjín kjoakixi-là. Koií kjoa-là nga ngasa kjótseé, Nainá, tíkoña kjoa-né, mikiì nìton kitsjaà-là kjo'in xita koni s'ín ok'in-là jé xi tsohótsji. 26 Tanga i'ndeì tí'ya-là nga ìt'aà ts'e Jesucristo tísindaàjìln-là xita

jñà kjoa-la jé xi kisìchroba mé-ne nga kàta'ya-la Nainá nga xìtā kixi-né kò tìkoáá tìjè-ne Nainá xì kixi síkítsajna xìtā xì mokjeiín-la ìt'aà ts'e Jesús.

²⁷ ¿A 'ngaá koma takoán nga kixi tìtsajnaá nguixkòn Nainá? Majìn, mìkìi 'nga koma takoán. Nga mìtsà koi kjoa-la nga kjotìxoma nìkitasoán. Jè-né nga mokjeiín-ná ìt'aà ts'e Jesús nga kixi síkítsajna-ná Nainá. ²⁸ K'oaá tsòya-ne ngats'ìi kjoa koi nga Nainá síkixi xìtā k'e nga mokjeiín-la ìt'aà ts'e Jesús; mìtsà koi nga kjotìxoma ts'e Moisés síkìtasòn.

²⁹ ¿A tà ts'eé xi xìtā judío Nainá? ¿A mìtsà tìkoá ts'e xi taxkì xìtā? Kjoa kixi-né, tìkoáá ts'e-né xi taxkì xìtā xì mìtsà xìtā judío. ³⁰ Nainá, tà jngoò ma xì kixi síkítsajna ngats'ìi xìtā k'e nga mokjeiín-la ìt'aà ts'e Jesús. Ngàsòn síkò jñà xìtā judío xì tìjìt'aà chìba-la kò xi taxkì xìtā xì mìkìi tìjìt'aà chìba-la.

³¹ Jè kjoa nga mokjeiín-ná ìt'aà ts'e Jesucristo, ¿a tìchahingui-né kjoa ts'e Kjotìxoma? Majìn, mìtsà tìchahingui; tà saá tìmajngoò-ne koni jè xá xì tìjìn-la.

4

Abraham, mé-ne kixi tsibìjna-ne nga nguixkòn Nainá

¹ ¿Kó kixoán? ¿Mé kjoa kixi xi kisakò-la na'èn-jchá-kjìin-ná Abraham nga kixi tsibìjna nguixkòn Nainá? ² Na'èn-jchá-ná Abraham, tsà koií-la kjoa-la nga ndaà xá xi kis'ìin nga kixi tsibìjna nguixkòn Nainá, ok'ín-la nga jeya sìikíjna yijo-la, tanga majìn nga nguixkòn Nainá. ³ Nga k'oaá s'ín tìchja Xojon jchínga-la Nainá nga tsò: “Abraham, jè-né nga kòkjeiín-la ìt'aà ts'e Nainá; k'oaá ma-ne nga kiskoétjò Nainá nga xìtā kixi

kitsò-la.” ⁴ Jngoò x̣iṭa xi ṣíxá, jè ṭon xi ṭjoé-la, mìtsà ṭà ḳjoṭjò ṭjoé-la; jè cḥj̄í-la nga ṣíxá. ⁵ Ṭanga jè x̣iṭa xi mìtsà x̣á-la ma'ñót'aà takòn, ṭanga moḳjeiín-la ìt'aà ts'e Nainá xi kixi ṣíkítsajna x̣iṭa xi jé ṭjín-la, x̣iṭa jè, Nainá k'oáá s'ín skoéṭjò nga x̣iṭa kixi tsò-la. ⁶ Jè x̣iṭaxá ìṭjòn xi ki'mì David k'oáá ṭis'ín kiùcḥja nga tṣja s'e-la x̣iṭa xi Nainá ḳjoéṭjò nga x̣iṭa kixi tsò-la; Nainá mì ṭi kindà s'ín-ne n̄iṭa mé xi s'ín. ⁷ David kitsò:

Mé ṭà ndaà-la j̄nà x̣iṭa xi jye kichàat'aà-la ḳjoa ch'o-la

ḳo xi jye ṭj̄tsa'ma jé-la.

⁸ Mé ta ndaà-la j̄nà x̣iṭa xi mì ṭi kindà s'ín-ne Nainá ḳjoa ts'e jé-la.

⁹ Jè ḳjondaà jè, ¿a ṭà ts'eé x̣iṭa judío xi ṭjít'aà cḥiba-la? ¿A xi ṭikoaá ts'e-né xi tax̣ḳi x̣iṭa xi mìḳi ṭjít'aà cḥiba-la? Jye okixan nga jè x̣iṭa jchínga Abraham, k'e nga kòḳjeiín-la ìt'aà ts'e Nainá, kiskoéṭjò-né nga x̣iṭa kixi kitsò-la. ¹⁰ ¿Kós'ín komà nga kiskoéṭjò Nainá Abraham nga x̣iṭa kixi kitsò-la? ¿A k'e-né nga jye ṭjít'aà cḥiba-la? ¿A xi k'e-né nga ṭikj'eè ṭjít'aà cḥiba-la? Majìn, k'e-né nga ṭikj'eè ṭjít'aà cḥiba-la. ¹¹ Abraham, k'e nga jye kiskoéṭjò Nainá nga x̣iṭa kixi kitsò-la, ìskaán kisit'aà cḥiba-la koni jngoò cḥiba xi okó nga jye x̣iṭa kixi nga kòḳjeiín-la ìt'aà ts'e Nainá k'e nga ṭikj'eè ṭjít'aà cḥiba-la. K'oáá komà-ne nga x̣iṭa jchínga kitsò-la Abraham ngats'ìì x̣iṭa xi moḳjeiín-la ìt'aà ts'e Nainá nas'ín mìḳi ṭjít'aà cḥiba-la. ¹² Abraham, ṭikoaá x̣iṭa jchínga-la-né j̄nà x̣iṭa judío xi ṭjít'aà cḥiba-la, ṭanga mìtsà ṭà koií ḳjoa-la nga ṭjít'aà cḥiba-la, ṭikoaá koi-né nga ya ṭjimaṭj̄ngui-la

nga mokjeiín-la ìt'aà ts'e Nainá, koni s'ín kòkjeiín-la Abraham k'e nga tìkj'eè tít'aà chiba-la.

¹³ Nainá, k'oaá s'ín kitsjaà-la tso'ba Abraham kò ngats'ìi xita tje-la, nga jè kòngatsja isò'nde; mìtsà koi kjoa-la nga Kjotíxoma kisikitasòn, jè-né nga kòkjeiín-la koni s'ín kiichja Nainá, k'oaá ma-ne nga xita kixi kitsò-la. ¹⁴ Tsà tà jña tjoé-la kjondaà xita xi síkitasòn Kjotíxoma, tsà k'oaá s'ín tjin kjoa, nímé-là chí-la nga mokjeiín-ná ìt'aà ts'e Nainá; tìkoaá mì-là kii kitasòn koni s'ín kitsjaà tso'ba Nainá. ¹⁵ K'e nga tjin Kjotíxoma, kjo'íin sinè-ná; tanga tsà tsjin kjotíxoma, nímé tjin xi kotonè-la kjotíxoma.

¹⁶ Jña xita, nga mokjeiín-la ìt'aà ts'e Nainá tjoé-la kjondaà koni s'ín kitsjaà-la tso'ba Nainá jè Abram. Nainá tsjá kjotjò kjondaà koi mé-ne nga jcha-ná nga kixi kjoa nga kitasòn ìt'aà ts'e ngats'ìi tje-la Abraham. Mìtsà tà jña tjoé-la xita judío xi tje-la Abraham nga tjin-la kjotíxoma; tìkoaá tjoé-la jña xita xi mìtsà xita judío xi tìkoaá tje-la Abraham ma koií kjoa-la nga mokjeiín-la koni s'ín kòkjeiín-la Abraham. K'oaá ma-ne nga jè Abraham, xita jchínga-ná ma ngats'iaá ¹⁷ nga nguixkon Nainá. Koni s'ín tíchja Xojon-la Nainá nga tsò: “Kjin naxandá xita xi jye kisìngatsja-lè xi xita jchínga tsò-lè.” Abraham, kòkjeiín-la ìt'aà ts'e Nainá xi ma-la síkjaáya-la xita xi jye k'en xi tìkoa tsjá 'én-la koni tsà jye tsitasòn kjoa xi kj'eè bitasòn.

¹⁸ Xita jchínga Abraham kòkjeiín-la koni kitsò-la Nainá; kiskoña kjoa-né nas'ín mìkii tíjün-la kós'ín koma nga kitasòn. K'oaá s'ín komà nga kjin naxandá xi xita jchínga tsò-la, koni s'ín kitsjaà-la

tso'ba Nainá nga kitsò-la: “K'oaá s'in kjin jchán koma tje-lè.” ¹⁹ Abraham, mìkì kjòhindaà koni s'in kòkjeín-la ìt'aà ts'e Nainá, nas'in kos'in beè-la ikon nga mì tì mé chjì-la yijo-la nga jye 'ñó xita jchínga; jyeé kjomeè jngoò sìndò nó tjín-la; Sara xi chjoón-la, tikoá chjoón 'ndi-né; mì tì kii koma s'e-la ìxti. ²⁰ Abraham, mìtsà jò tsi'beé-la ikon koni s'in mokjeín-la 'én xi kitsjaà-la Nainá. Tà isaá 'ñó tsi'beé-la ikon nga ndaà kòkjeín-la. 'Ñó jeya kisikína Nainá. ²¹ Abraham, nguì ndaà tíjngò ikon nga Nainá tjín-la nga'ñó nga komaá-la sìkitasòn yije kòhotjín kjoa koni s'in kitsjaà-la tso'ba. ²² K'oaá ma-ne Nainá, k'e nga kijtseè nga ndaà mokjeín-la Abraham, kiskoétjò nga xita kixi kitsò-la.

²³ Mìtsà tà ìt'aà ts'e Abraham kitjei xojon jè nga Nainá kiskoétjò nga xita kixi tsò-la. ²⁴ Tikoá ìt'aà tsaján kitjei nga Nainá skoétjò-ná nga ngàsòn xita kixi kitso-ná koi kjoa-la nga mokjeín-ná ìt'aà ts'e Nainá, jè xi kisikjaáya-la Na'èn-ná Jesucristo ìt'aà ts'e kjoabiyaà. ²⁵ Kjòngatsja xita nga kisik'en Jesús jè ngatji-la jé-ná; tikoá jaáya-la mé-ne nga kixi kitsajnaà nguixkon Nainá.

5

Mé kjondaà xi sakó-ná nga jye xita kixi tsò-ná Nainá

¹ K'e nga jye xita kixi 'mì-ná nga mokjeín-ná ìt'aà ts'e Nainá, jyeé 'nchán titsajnaakoá Nainá ìt'aà ts'e Na'èn-ná Jesucristo. ² Jè Cristo tsjá-ná nga s'e-ná kjondaà jè, nga mokjeín-ná ìt'aà ts'e. Jè kjondaà jè, 'ñó ndaà tíjìn inima-ná; matsjaá-la inima-ná nga chiñà kjoá nga tikoá s'e-ná

kjoajeya-la Nainá. ³ Mìtsà tà koi kjoa nga matsja-ná, tìkoaá matsja-ná k'e nga mé kjo'in xi otojñaá. K'e nga kjo'in otojñaá, yaá sakó-ná nga'ño nga tseejta s'eén inima-ná. ⁴ K'e nga tseejta s'eén inima-ná, yaá sakó-ná nga ndaà kitjoaá; tsà nga ndaà kitjoaá, tìkoaá yaá sakó-ná nga skóña kjoa inima-ná kjondaà xi tsjá Nainá. ⁵ Jè kjoa xi chiñá-lá nga tǵngoò takoán, mìkiì masobà-ná nga mìkiì kítasòn; jè Nainá jyeé ndaà kisikǵnajiìn inima-ná kjotjòcha-la it'aà ts'e Inima Tsjeè-la Nainá xi kitsjaà-ná.

⁶ K'e nga kichóya nachrjein, Cristo, k'en ngajo-ná jña xi xita jé 'mì-ná, koií kjoa-la nga tsjìn-ná nga'ño nga ma bitjokàjñaá jé-ná. ⁷ Mì-là yá xita tǵín xi kiyátjì ngajo-la jngoò xita kixi, tanga tsà koi nachrjein-la tsà tǵín jngoò xi ko'ño ikon nga kiyátjì ngajo-la jngoò xi 'ño ndaà xita. ⁸ Tanga jè Nainá okó-ná nga 'ño tsjakeè-ná nga jè Cristo k'en ngajo-ná, k'e nga tákó xita jé 'mì-ná. ⁹ I'ndeì nga jye xita kixi tsò-ná Nainá nga jè Cristo tsibíxteèn jní-la k'e nga k'en ngajo-ná, isaá 'ño tǵikixi kjoa nga it'aà ts'e Cristo kitjokàjñaá kjo'in jè nachrjein k'e nga sǵikasén kjojtì-la Nainá. ¹⁰ K'e nga kondra titsajna-lá Nainá, jè Ki'ndí-la kisikijne 'nchán kjoa k'e nga k'en. I'ndeì, k'e nga jye ndaà chibà-ná, isaá 'ño tǵikixi kjoa nga kitjokàjñaá kjo'in it'aà ts'e Cristo nga jè tǵinakon-né. ¹¹ Mìtsà tà jña kjoa koi, tìkoaá 'ño matsja-ná it'aà ts'e Nainá koni s'ín kisiko-ná it'aà ts'e Na'èn-ná Jesucristo nga it'aà ts'e Cristo 'nchán titsajnakoaá Nainá nga jye kichibàndaà-aná.

¹² K'e nga jahas'en jé isò'nde, jngoò xita xi ki'mì Adán tsohótsji jé, ikjoàn k'en; k'oaá s'ín komà nga

kjòts'ia nga biyaà yije kóhòtjín x̣ita, koií kjoa-la nga jé ótsji yije kóhòtjín. ¹³ K'e nga ṭikj'eè tjoé-la Kjoṭixoma Moisés, x̣ita xi ṭjín isò'nde jyeé ṭjín yije-la jé. Tanga mìkìl ma kindà jé-la k'e nga tsjìn kjoṭixoma. ¹⁴ Tjen-ne nachrjein ts'e Adán skanda ts'e Moisés, ṭjínè-la nga ḳiyá yije x̣ita kóhòtjín nas'ín mì k'oaá ṭjín jé xi tsohótsji koni kis'iìn Adán nga kisikatonè-la okixi xi kitsjaà-la Nainá. Adán, jé गया-la [Cristo] xi iskan j'iì.

¹⁵ Tanga jé xi tsohótsji Adán, mìkìl mangásòn koni jé kjondaà xi Nainá tsjá; nga tà jé ngaṭjì-la jé xi tsohótsji xi tà jngoò x̣ita, k'oaá ma-ne nga kjìn x̣ita biyaà; tanga isaá 'ñó tse kjondaà ṭjín-la Nainá nga kjìn x̣ita machikon-t'in kjoṭjò xi tsjá Nainá it'aà ts'e xi tà jngoò x̣ita xi 'mì Jesucristo. ¹⁶ Jé xi tsohótsji xi tà jngoò x̣ita, mìkìl mangásòn koni jé kjondaà xi Nainá tsjá. K'e nga kisakò jé ítjòn, Nainá kitsjaà okixi nga tsibínè-la kjo'in ngats'iì x̣ita. Tanga k'e nga jye kjìn jé tsohótsji x̣ita, j'iì kjondaà-la Nainá nga kixi ḳítsajna x̣ita nguixkòn Nainá. ¹⁷ Jé ngaṭjì-la jé-la xi tà jngoò x̣ita, ṭjínè-la nga ḳiyá x̣ita. Tanga i'ndeì, isaá 'ñó ṭjíkixi kjoa nga it'aà ts'e xi tà jngoò x̣ita xi 'mì Jesucristo, ṭjì'nde-la nga jeya ḳítsajnakon j̣nà x̣ita xi 'ñó tse kjondaà-la Nainá kjoé, ḳo xi 'ñó tse kjoṭjò tjoé-la nga kixi ḳítsajna nguixkòn Nainá.

¹⁸ Jé kjoa-la jé xi tsohótsji xi tà jngoò x̣ita kisínè-la kjo'in ngats'iì x̣ita, tanga jé kjoa kixi xi kis'iìn Jesucristo ṭikoaá kixi kisiḳítsajna ngats'iì x̣ita nga ḳítsajnakon nguixkòn Nainá. ¹⁹ Jé kjoa-la nga mìkìl ḳiì'nchréñijon-la Nainá xi tà jngoò x̣ita xi 'mì Adán, k'oaá ma-ne nga kjìn x̣ita kisakò jé-la.

Tanga jè kjoa-la nga kii'nchréñijon-la Nainá xi tà jngoò xita xi 'mì Jesucristo, kjìn xita xi kixi kítsajna nga nguixkon Nainá.

²⁰ J'ii Kjotíxoma-la Moisés mé-ne nga ndaà ki'ya-la nga isa 'ño isa 'ño tís'e jé; tanga k'e nga isa tse jé tísakó, isaá 'ño tse kjondaà-la Nainá j'ii.

²¹ Nga sa ítjòn, jè kjoa ts'e jé tsatíxoma-la xita, mé-ne nga kisakò-la kjoabiyaà xita; tanga j'ndeñ, k'oaá tís'in kàtatíxoma kjondaà-la Nainá k'e nga kixi síkítsajna xita nga nguixkon Nainá mé-ne nga s'e-la kjoabinachon nita mé nachrjein-ne xi it'aà ts'e Na'èn-ná Jesucristo.

6

Mé-ne nga jè kjoa ts'e jé, mì tì mé nga'ño tijn-la nga jè kotíxoma-ná

¹ ¿Kó kixoán? ¿A ndaà tijn nga kinchátsji-jé-isa mé-ne nga isa tse kjondaà tsjá-ne Nainá? ² Majìn, mì kii tì k'oa s'en-ná. Jyeé titsajnat'aàxìn-lá kjoa ts'e jé koni tsà jye k'eén xi it'aà ts'e; mì tì kii koma ya kítsajnajìin-isaá kjoa ts'e jé. ³ ¿A mìtsà jye tìjìin-nò k'e nga komà bautizar it'aà ts'e Cristo ngats'iaá nga tikoá ya titsakjoòkoáá k'e nga k'en? ⁴ K'e nga ma bautizar xita, k'oaá s'in ngaya-la koni tsà ya sihiijìn-t'aà-là Cristo k'e nga k'en. Koni s'in jaáya-la Cristo it'aà ts'e nga'ño-la Nainá xi 'ño jeya tijná, k'oaá tís'in mochjeén nga kos'in sijchá yijo-ná nga kijnakon xitse ijngoò k'aá.

⁵ Koni s'in titsakjoòkoáá Cristo k'e nga k'en, jña k'oaá tís'in kjoáya-ná koni s'in jaáya-la jè.

⁶ Tìjìin-ná nga jè kjoa jchínga-ná koni s'in ki'né nga isa kjòtseé, yaá kisit'aà krò-la Cristo mé-ne

nga kàtachija-ne nga'ñó-la yijo jé-ná nga mì tì jé kjoṭíxoma-ìsa-ná. ⁷ Jngoò xìtá xi jye k'en, jyeé tijnandeí kjoa ts'e jé. ⁸ Nga ya k'en-koaá Cristo, mokjeíin-ná nga tìkoa ya kìtsajnakoaá. ⁹ 'Ya-ná k'e nga jaáya-la Cristo k'e nga k'en, nì tì jngoò nachrjein kiyá ìjngoò k'a-ne. Mì tì mé nga'ñó tjin-la kjoabiyaà nga jé kòtìxoma-la. ¹⁰ K'e nga k'en Cristo, jngoò k'a k'en xi kjoa ts'e jé-ná; ì'ndeí nga ìjngoò k'a tijnakon-né koií kjoa tijnakon-ne nga jeya síkíjna Nainá. ¹¹ Jñò, k'oaá tìs'ín tìkìtsjeèn koni tsà jye k'eèn xi kjoa ts'e jé; tìtsajnakon-nò xi kjoa ts'e Nainá nga ya tìtsajnakoo Na'èn-ná Jesucristo.

¹² Koií kjoa-la, mì tì kii bìi'nde-la yijo jé-nò nga jé kjoa ts'e jé kòtìxoma-nò k'e nga kjo'ñó s'ín-nò nga nìkitasòn-la kjoa xi ch'o tjin xi síjé yijo-nò. ¹³ Kì ya nìngatsja yijo-nò kjoa ts'e jé nga jé jé síkjeén nga ch'o 'nè, tã saá jé Nainá tìngatsja yijo-nò koni jngoò xìtá xi jye jaáya-la ìt'aà ts'e kjoabiyaà. Nainá tìngatsja yijo-nò nga kàtasíkjeén kjoa xi kixì tjin. ¹⁴ Kjoa ts'e jé, mì tì mé nga'ñó tjin-la nga jé kòtìxoma-nò nga mìtsà kjoa ts'e kjoṭíxoma-la Moisés tìtsajnajñòò; kjondaà-la Nainá tìtsajnajñòò.

¹⁵ ¿Kó bixoán? ¿A ndaà tjin nga kìnchátsji jé ìsaá nga kjondaà-la Nainá tìtsajnajñaá nga mìtsà kjoa ts'e kjoṭíxoma tìtsajnajñaá? Majìn, mìkii ndaà tjin. ¹⁶ Ndaà tjiin-nò tsà ya sìngatsja yijo-nò ts'e xìtá xi bìtje chì'nda nga jé nìkitasòn-la, chì'nda-la komaà ts'e xìtá jé. Kjo'ñó tjin-ne nga jé sìkitasòn-la. K'oaá s'ín tjin, tsà chì'nda-la jé komaà nga jé sìkitasòn-la, kiyá-nò; tanga tsà chì'nda-la Nainá komaà nga jé sìkitasòn-la, kixìí kìtsajnaà nguìxkon jé. ¹⁷ Jñò, nga ìsa kjòtseé, k'oaá s'ín kìnìkitasòn-la kjoa ts'e

jé koni tsà jngoò chì'nda, tànga i'ndeì, ndaà chjí-là Nainá nga kò inìma-nò ndaà nìkitasòn koni s'ín nguì ndaà tjín 'én kixì xi kis'enojmi-nò. ¹⁸ I'ndeì jyeé titsajnadeìí-là kjoa ts'e jé; chì'nda ts'e kjoakixi-nò; tjínè-nò nga sikitasòn koni s'ín síjé kjoakixi. ¹⁹ Koi 'én tìchjàkò-nò xi mìtsà 'in chjà koií kjoa-là nga indaà tjín takòn; mìkì ndaà machiya-nò kjoa ts'e Nainá. Koni s'ín ki'nè nga ìsà kjòtseé nga yà kinìngatsja yijo-nò it'aà ts'e ngats'ì kjoach'o xi tjín nga jè tsatìxoma-nò koni xìtà chì'nda; i'ndeì k'oaá tis'ín tìngatsja yijo-nò it'aà ts'e kjoa kixì mé-ne jè kjoa kixì kàtatìxoma-nò koni chì'nda xi tsjeè títsajna nga nguixkòn Nainá.

²⁰ K'e nga kjoa ts'e chì'nda-là jé titsajnajñoò, mìkì titsanìkitasòn-là kjoakixi-là Nainá. ²¹ Tànga, ¿mé xi kisakò-nò kjoa ts'e jé? I'ndeì tà masobà-nò kjoa koi; tà yáá fikò-ná ñánda tjín kjoabiyaà. ²² I'ndeì nga jye titsajnadeìí-là xi kjoa ts'e jé, chì'nda-là Nainá ma; kjondaà xi sakó-nò jè-né nga tsjeè titsajnaà nga nguixkòn Nainá. Xi fehet'aà-ne, s'e-nò kjoabinachon nìtà mé nàchrjein-ne. ²³ Chjí xi tjín-là kjoa ts'e jé, kjoabiyaà-né. Tànga kjotjò xi tsjá Nainá, kjoabinachon-né nìtà mé nàchrjein-ne nga yà titsajnakoaá Cristo Jesús xi Nà'èn-ná ma.

7

Kó s'ín ma fehet'aà nga'ño-là jè kjotìxoma

¹ Jño, xi 'ndseeé chibà, tìchjàkò-nò xi jyeé tjìin-nò kós'ín tìchjà kjotìxoma; 'ya-nò nga tjín-là nga'ño jè kjotìxoma kós'ín otìxoma-là xìtà k'e nga títsajnakon-ìsà skanda k'e nga kiyá. ² K'oaá ngaya-là jngoò chjoón xi tjín-là x'ín, k'oaá tsò

kjotíxoma nga mìkiì koma tsjín xíkjín k'e nga tákó títajnakon ingajò. Tanga tsà jè x'in kiyá, jè chjoón, jye tijnandeíí it'aà ts'e kjotíxoma xi ts'e kjoabixan. ³ Jè chjoón, k'e nga tsà tákó tijnakon x'in-la, tsà kj'eíí x'in kixan-kò, kjoa chijnguíí tís'in; tanga tsà jye k'en x'in-la, jè chjoón, jyeé tijnandeíí xi kjoa ts'e kjotíxoma jè; komaá kixan-kò ijngoò k'a-ne xi kj'eíí x'in. Mì tì kjoa chijnguíí tís'in-ne.

⁴ Jñò ndí 'ndsè, k'e nga k'en-kjoòkòò Cristo, yaá k'en it'aà ts'e nga'ñó-la kjotíxoma, mé-ne nga ya kinókjoa-nò it'aà ts'e Cristo xi jye jaáya-la ts'e kjoabiyaà nga k'oas'ín kàta'ya-la it'aà tsaján jè kjondaà xi sasén-la Nainá. ⁵ K'e nga tisa ya tjaajñaá kjoa xi tjin isò'nde, jè kjotíxoma tsibít'in-ná mé-ne nga jña kjoa ch'o xi síjé yijo-ná, isa 'ñó ch'o kisixájiin yijo-ná; k'oaá komà-ne nga kisakò-ná kjoabiyaà. ⁶ Tanga j'ndeí jyeé títajnandeíí-lá kjoa ts'e kjotíxoma. Jyeé k'eén it'aà ts'e kjoa xi bít'aà'ñó-ná, mé-ne nga koma sixá-lá Nainá xi kjoa xitse koni s'in okóya-ná Inima Tsjeè-la Nainá. Mìtsà k'oas'ín sixá-lá koni s'in tjin kjoa jchínga xi tjít'aà xojon.

⁷ ¿Kó kixoán xi kjoa ts'e kjotíxoma? ¿A ch'o tjin? ¿A kjoa ts'e jé-né? Majin, ndaà tjin. Tanga 'an, tsà mìkiì kijtseèxkoan kjoa ts'e kjotíxoma, tikoáá mì-là kii kijtseè kjoa ts'e jé. Mì-là kii kisijiin-na nga mìkiì ndaà tjin nga 'an fahajiin-na tsojmì xi mìtsà ts'an, tsà jè kjotíxoma mì k'oaá s'in bénojmi nga tsò: “Kì jì nikjaajiin tsojmì xi mìtsà tsiji.” ⁸ Kjoa ts'e jé, yaá kisakò-la nga'ñó it'aà ts'e kjotíxoma; k'oaá komà-ne nga isa 'ñó jahajiin-na tsojmì xi mìtsà ts'an. Tanga tsà tsjin kjotíxoma, tsjin-la nga'ñó kjoa ts'e jé. ⁹ K'e

nga sa kjòtseé, kj'eè kiì bexkoan kjotíxoma. Tanga k'e nga kijtseèxkoan kjotíxoma, kjoa ts'e jé, isaá ndaà kis'e-la nga'ño; kjoabiyaà kisakò-na. ¹⁰ Kjoa ts'e kjotíxoma, tjínè-la nga kjoabinachon tsjá-na, tanga tà saá kjoa biyaà kitsjaà-na. ¹¹ Kjoa ts'e jé, yaá kisakò-la nga'ño it'aà ts'e kjotíxoma nga kiskoònachan-na, k'oa kisik'en-na.

¹² K'oaá s'ín tjín nga jé Kjoatíxoma, tsjeè-né; koni s'ín otíxoma jña 'én xi tjít'aà, tsjeè-né, kixi-né, koa ndaà-né. ¹³ ¿Kó bixón? ¿A jé kjoa ts'e kjotíxoma xi ndaà tjín xi kisik'en-na? Majìn, mìtsà koi kjoa-la. Kjoa ts'e jé-né. K'oaá s'ín ki'ya-la nga kixi kjoa nga jé-né. It'aà ts'e kjotíxoma xi ndaà tjín, jé kjoa ts'e jé kisakò-la nga'ño nga kisik'en-na, mé-ne nga ki'ya-la it'aà ts'e kjotíxoma nga 'ño ch'o tjín xi kjoa ts'e jé.

Kó tsò xita xi otíxoma-la kjoa ts'e jé

¹⁴ Kjoa ts'e kjotíxoma, 'ya-ná nga kjohítsjeèn ts'e Inima Tsjeè-la Nainá; tanga 'an, yijo jé tsohoya; yijo-na yaá kjòngatsja kjoa ts'e jé nga jé otíxoma-na.

¹⁵ Mikiì fiya-na mé kjoa xi s'iaàn. Kjoa xi ndaà tjín xi mejèn-na nga s'iaàn mikiì koa s'iaàn. Tà saá jña kjoa xi mikiì sasén-na sikitasoàn. ¹⁶ K'e nga k'oa s'iaàn jña kjoa xi mikiì mejèn-na, k'oaá xan nga tjíxixi kjoa nga ndaà tjín koni s'ín tíchja kjotíxoma.

¹⁷ K'e nga k'oa s'iaàn nga otsjià jé, mìtsà 'an xi k'oa s'iaàn, jé kjoa ts'e jé xi tíjìn-na bít'in-na. ¹⁸ 'An xi xita isò'nde 'mì-na, be-ná nga mikiì ndaà tjín kjoa xi tíjìn yijo-na. Mejèn-na nga ndaà s'iaàn, tanga mikiì sakó-na kó s'ín s'iaàn kjoa xi ndaà tjín. ¹⁹ K'e nga mejèn-na ndaà s'iaàn, mikiì sikitasoàn; tà saá koi sikitasoàn kjoa xi ch'o tjín xi majìn-na nga koa

s'iaàn. ²⁰ K'e nga k'oas'ín sikitasoàn kjoa xi ch'o tjin xi majin-na nga koa s'iaàn, mitsà 'an xi k'oa s'iaàn, jè kjoa ts'e jé xi tijnajin-na xi k'oas'ín.

²¹ Jngoò kjoa matsji-na nas'ín mejèn-na nga ndaà s'iaàn, tà saá tà koi sakó-na kjoa xi ch'o tjin.

²² Xi jjin inima-na matsja-na it'aà ts'e Kjotixoma-la Nainá. ²³ Tanga tjin jngoò kjoa xi tísxájin yijo-na xi mìki tsjá'nde-na nga ndaà s'iaàn; jè kjoa ts'e jé kjaán-kjoò kjohitsjeèn-na xi mejèn-la nga ndaà s'iaàn. Kjoa ts'e jé xi tísxájin yijo-na síkijne-na nga ch'o s'iaàn.

²⁴ Ima xó-na 'an; zyá xi síkijnandeí-na it'aà ts'e yijo jé-na xi kjoabiyaà tjin-la? ²⁵ Ndaà chí-la Nainá nga it'aà ts'e Na'èn-ná Jesucristo síkijnandeí-ná kjoa ts'e jé.

Nga jñà 'én xi kotìxan-nò nga 'an, ya jjin kjohitsjeèn-na mejèn-na sikitasoàn kjotixoma-la Nainá, tanga ya jjin yijo jé-na, tà saá kjoa ts'e jé sikitasoàn.

8

Mé kjondaà xi sakó-ná k'e nga k'oas'ín titsanjchá yijo-ná koni s'ín mejèn-la Inima Tsjeè-la Nainá

¹ Tanga j'ndeí, jñà xita xi ya titsajnakjoòko Cristo, mì ti mé kjo'in sinè-la, jñà xita xi mì k'oaá s'ín nchisíchá yijo-la koni tjin jé xi síjé yijo-la; tà saá k'oaá s'ín nchisíchá yijo-la koni s'ín mejèn-la Inima Tsjeè-la Nainá. ² Jè nga'ño-la Inima Tsjeè-la Nainá xi síkítsajnakon-ná nga ya titsajnakjoòkoá Cristo; kò tijè-ne nga'ño xi kíkítsajnandeí-ná it'aà ts'e nga'ño-la kjoa ts'e jé kò it'aà ts'e kjoabiyaà. ³ Kjotixoma ts'e Moisés

mìkiì kichìkjoa-là nga síkítsajnandejì-ná it'aà ts'e jé, nga tsjìn-là nga'ńó, koi kjoa-là nga jè yijo-ná síjé jé xi tjín isò'nde. Tanga Nainá kichìkjoaá-là nga kisikasén Ki'ndí-là koni jngoò xi xìtá isò'nde xi yijo kis'e-là koni jńá xi xìtá jé 'mì-ná. Ki'ndí-là kitsjaà kjotjò yijo-là nga k'en xi kjoa ts'e jé-ná. Nainá k'oaá s'ín kis'ìnn nga jngoò k'a kisìkجهet'aà kjoa ts'e jé xi tjín-là yijo-ná. ⁴ Nainá k'oaá s'ín kis'ìnn mé-ne nga it'aà tsaján kàtítasòn-ne jè kjoa kixì xi ts'e kjotíxoma, jńá xi mì k'oaá s'ín títšanìjchá yijo-ná koni tjín jé xi síjé yijo-ná, nga k'oas'ín títšanìjchá yijo-ná koni s'ín mejèn-là Inìma Tsjeè-là Nainá.

⁵ Jńà xìtá xi k'oa s'ín koni tjín xi síjé yijo-là, k'oaá tjín kjoa xi nchisíkítsjeèn; tanga jńà xi k'oa s'ín koni s'ín tjín xi síjé Inìma Tsjeè-là Nainá, k'oaá tjín kjoa xi nchisíkítsjeèn. ⁶ Jńà xìtá xi k'oas'ín nchisíkítsjeèn koni tjín xi mejèn-là yijo-là, kjoabiyaà tjín-là. Tanga jńà xìtá xi k'oas'ín nchisíkítsjeèn koni s'ín mejèn-là Inìma Tsjeè-là Nainá, tjín-là kjoabinachon kò kjoa'nchán. ⁷ Xìtá xi tà koi kjoa nchisíkítsjeèn koni tjín kjoa ch'o xi síjé yijo-là, kondra ts'e Nainá-né koi kjoa-là nga mìkiì síkitasòn kò mìkiì chíkjoa-là nga síkitasòn kjotíxoma-là Nainá. ⁸ Jńà xìtá xi k'oas'ín s'ín koni tjín xi síjé yijo-là, mìkiì ma-là s'ín koni s'ín sasén-là Nainá.

⁹ Tanga jńò, mì tì k'oaá 'nè-nò koni tjín xi síjé yijo-nò; k'oaá s'ín títšanè koni tjín xi síjé Inìma Tsjeè-là Nainá, nga jè tijnajìnn inìma tsajòn Inìma Tsjeè-là Nainá. Jńà xìtá xi tsjìn-là Inìma Tsjeè-là Nainá xi kitsjaà Cristo, mìtsà xìtá ts'e Cristo. ¹⁰ Tanga tsà yáá tijnajìnn inìma tsajòn Cristo, inìma tsajòn tijnakon-né nga xìtá kixì

'mì-nò nga nguixkɔn Nainá, nas'ín k'oas'ín tǵínè-là nga kiyá yijo-nò xi kjoa ts'e jé. ¹¹ Jè Nainá xi kisìkjaáya-là Jesucristo it'aà ts'e kjoabiyaà, tsà ya tǵnajiìn inìma-nò jè Inìma Tsjeè-là, k'oáá tǵs'ín sìlkítsajnakon òngòò k'a yijo-nò xi kjoa ts'e kjoabiyaà it'aà ts'e nga'ño-là Inìma Tsjeè-là Nainá xi tǵnajiìn inìma tsajòn.

¹² K'oáá ma-ne, jǵná xi 'ndseé chibá, tǵjna jngòò xi tǵínè-ná nga sìkitasòn-lá, tanga mìtsà jè yijo-ná sìkitasòn-lá; mì tǵ kùì k'oas'ín s'en-ná koni tǵín kjoa ch'o xi síjé yijo-ná. ¹³ Tsà tákó k'oáá s'ín s'een nga ya onguít'aà-là kjoa xi ch'o mejèn-là yijo-nò, kiyá-nò. Tanga tsà koi'nde-là Inìma Tsjeè-là Nainá nga jngòò k'a sìikijne-là kjoa xi ch'o mejèn-là yijo-nò, kítsajnakon-nò.

¹⁴ Jǵná xita xi jè Inìma Tsjeè-là Nainá okó-là ndiyá, jǵná-né xi òxti-là Nainá 'mì. ¹⁵ Jè Inìma Tsjeè xi kitsjaà-nò Nainá mìtsà taxkǵ inìma òma xi kjo'ño s'ín-nò koni jngòò chí'nda xi ts'e jé nga ma-là bíxkón-nò; ta sáá jè Inìma xi kitsjaà-ná Nainá skoétjò-ná nga òxti-là komaá, tǵjè-ne Inìma Tsjeè-là Nainá bénojímíya-ná nga ma nokjoà-lá Nainá nga Ndí Apa 'mì-lá. ¹⁶ Jè Inìma Tsjeè-là Nainá tsjá kixǵ-là 'én inìma tsaján nga òxti-là Nainá 'mì-ná. ¹⁷ K'e nga jye òxti-là maá, tǵkoáá tsaján-ná kǵotjò-là Nainá xi jye k'oas'ín kitsjaà tso'ba nga tsjá-ná; tañaá tǵoékjoè-ná kǵo Cristo nga tǵkoá kǵo jè tǵtsanìkjaán kǵo'in mé-ne nga jeya kítsajnakò-ná Cristo.

¹⁸ 'An, k'oáá xan nga kixǵ kjoa, koni tǵín kǵo'in xi tǵtsanìkjaán ò'ndeì mìkùì mangásòn koni tǵín kjoajeya-là Nainá xi s'e-ná k'e nga koma iskan.

¹⁹ Jǵná tsojmì xi Nainá tsibíndaà, 'ño nchikoña kjoa

nga mejèn-là skoe nachrjein k'e nga Nainá jngoò k'a ndaà kòkò kó kjoàn xi ixti-là ma. ²⁰ Jñà tsojmì xi tsibíndaà Nainá, jngoò k'a its'oòn-jìin koni s'ín tjínè-là nga kochjeén nga sa ítjòn; mìtsà kjotsja ts'e isò'nde nga k'oas'ín komàt'in; koi-né nga jè Nainá k'oaá s'ín kiskoòsòn-là; tanga i'ndeì jñà xi tsibíndaà Nainá nchikoñaá-là ²¹ nga kjoìi nachrjein k'e nga tìkoa kítsajnandeìi xi tsibíndaà Nainá nga mì tì kù kíts'ón-jìin-ne; Nainá jeya sùkítsajnandeìi i'jngoò k'a-ne koni s'ín sùkò ixti-là.

²² 'Ya-ná ngats'ìi xi Nainá tsibíndaà, skanda i'ndeì, nchitsiné-né, kjo'in nchisíkjeiín koni jngoò chjoón xi ki'ndí tí'beé. ²³ Mìtsà tà koi xi tjín isò'nde xi tsiné; tìkoaá jñà xi jye tjín-ná Inìma Tsjeè-là Nainá koni jngoò kjondaà xi tjen kitjoé ítjòn-ná, tìkoaá tsiné-ná nga kjo'in titsanìkjaán nga titsachiñá-lá nga 'nó mejèn-ná nga skoétjò-ná Nainá nga jngoò k'a ya kítsajnakoaá koni ixti-là maá; yijo-ná kíjnandeìi-ne it'aà ts'e kjoa xi síkits'ón-ná. ²⁴ Nga jye titsajnandiaá, i'ndeì jè titsachiñá-lá nga jngoò k'a kàtìtasòn. Tanga tsà tsejèn tíjna xi chiñá-lá mìkù ma chiñá-lá. ¿Yá xi koña-là xi tsejèn tíjna? ²⁵ Tanga tsà jè chíña-lá xi mìkù tsejèn tíjna, tafi tafi chíñakjoa-lá.

²⁶ K'oaá tìs'ín s'ín jè Inìma Tsjeè-là Nainá k'e nga indaàjìin tjín inìma-ná síchját'aà-ná. K'e nga mìkù ma-ná kó s'ín sùjèt'aà-lá Nainá k'e nga bìtsi'ba-lá, tìjè-ne Inìma Tsjeè-là Nainá bìtsi'batjì-ná, nìmé 'én xi tsejèn chja, nì itsé fìya-ná kó tsòya-ne. ²⁷ Jè Nainá xi ma-là bíxkejiìn inìma-ná, tíjìin-là mé xi tìbìtsjeèn-là jè Inìma Tsjeè-là. K'e nga bìtsi'batjì xitá tsjeè-là Nainá k'oaá s'ín sùjèt'aà-là koni s'ín mejèn-là Nainá.

Nìmé xi koma kochrjet'aàxìn-ná kjoatjòcha-la Nainá xi jye tjin-ná it'aà ts'e Cristo Jesús

²⁸ Tíjìn-ná nga it'aà ts'e jñà xita xi tjòkèè beè Nainá, ngats'iì kjoa xi mat'in, Nainá k'oaá s'ín síkjeén xi kjondaà ts'e xita. K'oaá s'ín síko jñà xita xi xó jè kiichja-la koni s'ín mejèn-la, ²⁹ jñà xita xi jye tíjìn-la nga tisa tàts'en-la kjoa nga ixti-la koma; tikoáá k'oaá s'ín kiskoòsòn-la nga ngàsòn kjoàn koma koni kji Ki'ndí-la mé-ne nga jè Cristo Ki'ndítjòn koma koa kjìn koma xita xíkjin xi 'ndse. ³⁰ Nainá nga k'oaá s'ín kiskoòsòn-la it'aà ts'e xita koi, tikoáá xó kiichja-la, jñà xi xó kiichja-la tikoáá kixijí kisikítsajna, jñà xi kixijí kisikítsajna tikoáá jeya kisikítsajna.

³¹ ¿Mé xi kixoán it'aà ts'e kjoa koi? Nga Nainá tíjnako-ná, nijngoò xita kondra-ná sùikijne-ná.

³² Nainá mìkii 'on komà-la, nga kitsjaà kjotjò Ki'ndí-la it'aà tsaján ngats'iaá skanda kjoabiyaà. ¿A mìtsà tikoá tsjá kjotjò-ná ngayije nga ko Cristo?

³³ ¿Yá xi koma kohòngui-ná jñà xi Nainá xó jaàjìn-ná? Mì yá xi koma kohòngui-ná nga jé Nainá jye kixijí kisikítsajna-ná. ³⁴ ¿Yá xi koiì'nè-ná kjo'in?

Nga jé Cristo Jesús k'en ngajo-ná, tikoá jaáya-la kjoa ts'e kjoabiyaà. Yaá tíjna it'aà kixijí-la Nainá nga tíbítsi'batjì-ná. ³⁵ ¿Yá xi kochrjet'aàxìn-ná kjoatjòcha-la Cristo?

¿A kjo'in-né? ¿O xi kjoaba-ne? ¿O xi jè-né nga ongatjingui-ná xita? ¿O xi kjoa ts'e kjinchrá-ne? ¿O xi koiì-né nga tsjìn-ná nikje xi chíkjá? ¿O xi jè kjoa xi xkón tjin? ¿O xi jè kjoa biyaà nga xita sík'en-ná? Majìn, nìmé kjoa-ne. ³⁶ K'oaá s'ín tíchja Xojòn-la Nainá nga tsò:

Xi kjoa tsiji kjit'aà nachrjein tjin kjoxkón nga

kíyá-jen,
k'oaá s'ín tíyatakòn-najen koni orrè xi tijnandaà nga
kíyá.

³⁷ Tanga it'aà ts'e ngats'iì kjoa koi, jye tsato
titsanikijne-lá xi it'aà ts'e Cristo xi kjòtsjakeè-ná.

³⁸ K'oaá s'ín tijnogoò takoán nga nijngoò kjoa xi
koma kochrjet'aàxìn-ná xi kjoatjòcha-la Nainá, nì
jè kjoa biyaà, nì kjoabinachon, nì àkjale, nì jñà
nga'ño xi tijn isò'nde nì jñà xi tijn jjiìn isén, nì jñà
kjoa xi tijn nachrjein i'ndeì, nì jñà kjoa xi koma
nachrjein xi sa nchrobá, ³⁹ nì jè xi isa 'nga, nì jè xi
isa nanga, nita mé tsojmi xi Nainá tsibíndaà, nímé
xi koma kochrjet'aàxìn-ná kjoatjòcha-la Nainá xi
jye tijn-ná it'aà ts'e Cristo Jesús xi Na'èn-ná.

9

*Mé-ne mikì ijchòtjìngui-là kjoa kixi-là Nainá jñà
xita Israel xi xó jaàjìin-ne*

¹ Okixì xi xan it'aà ts'e Cristo; mì 'én ndiso chjà;
jè Inimà Tsjeè-là Nainá síkichiya-là kjohítsjeèn-na
nga tsjá 'én it'aà ts'an, ² nga kjit'aà nachrjein ba
tijn-na koa 'on ma-là inimà-na, ³ it'aà ts'e jñà xita
'ndsè xi xinguiàa ma koi-né nga 'ño matsjake.
'Nó mejèn-na nga kàtasakó-là kjondaà. Skanda
komaá-là kòsit'aàxìn-là Cristo tsà k'oas'ín sakò-là
kjondaà jñà xita xinguiàa xi ts'e naxandá Israel,
tanga mikì tji'nde-na nga kos'ín s'iaàn. ⁴ Nga
jñà xita Israel, jè Nainá kiskoétjò nga ixti-là ma,
ko yaá ki'ya-là kjoajeya-là Nainá, ko kitjoé-là jñà
kjoa xi tsibíndaajìin-ko, tikoà kitjoé-là kjotíxoma-là
Moisés, ko kitjoé-là okixì kós'ín skoexkón Nainá,
ko kitjoé-là 'én koni s'ín kitsjaà-là tso'ba Nainá.

⁵ Jǎà x̄it̄a Israel yaá inchrobàt'aà-ne ts'e xi 'ñó x̄it̄a jchínga kjiín xi Nainá xó jaàjiín-ne. Jè Cristo [x̄i xó kisikasén-ne Nainá] nga x̄it̄a isò'nde komà, yaá inchrobàt'aà-ne it'aà ts'e x̄it̄a jchínga koi. Jè Cristo xi Nainá; jè otíxoma yije-là kjoa; jeya kàtìjna n̄it̄a kjé-ne. K'oas'ín kàtama.

⁶ [Nga mìtsà mokjeiín-là ngats'iì x̄it̄a Israel], mìtsà koi kjoa-là nga jè 'én-là Nainá mìkì bitasòn. Koi-né nga it'aà ts'e Nainá, mìtsà ngats'iì x̄it̄a xi ya nchrobát'aà-ne tje-là Israel nga nguì kixi kjoa nga ya chja-ne. ⁷ Nas'ín ya tje-là it'aà ts'e Abraham, mìtsà ngats'iì nga kitjoé-là kjondaà nga ixti-là ma. Nga k'oaa tsò Xojon-là Nainá: “Jǎà x̄it̄a tje-lè, yaá kjinchrobà-ne it'aà ts'e Isaac.” ⁸ Kjoa koi, k'oaa tsóya-ne, nga jǎà ixti-là Nainá, mìtsà jè xi chjì-là yá ts'e tje xi nchrobát'aà-ne. Ta jǎà-né xi ixti-là Nainá ma jǎà xi jye k'oas'ín kitsjaà tso'ba Nainá nga ixti-là koma. Tà jǎà-né xi k'oas'ín oxkit'aà nga kixi kjoa nga nguì tje-là Abraham ma. ⁹ Nga jè 'én xi Nainá kitsjaà-là tso'ba Abraham, k'oaa tsò: “Jè nó xi sa nchrobá kjoíí ìngoò k'a-na; jè Sara, ki'ndí s'e jngoò-là.”

¹⁰ Mìtsà ta jǎà kjoa koi xi komà. Tìkoaá jè Rebeca kis'e-là ixti'ño xi ts'e Isaac, jè xi x̄it̄a jchínga-ná ma. ¹¹ Nainá k'oaa s'ín kitsjaà tso'ba k'e nga tikj'eè ts'iin jǎà ixti'ño nga tikj'eè kii 'ya-là mé kjoa xi s'iin, a jè xi ndaà tjín, o jè xi mìkì ndaà tjín. K'oaa s'ín kjòkixi nga Nainá tjí'nde-là nga kjoaájiin x̄it̄a koni s'ín jye tjíndaà-là nga kichja-là jǎà x̄it̄a xi jè mejèn-là. Mìtsà kindà s'ín mé xi jye kis'iin x̄it̄a. ¹² Nainá k'oaa kitsò-là Rebeca: “Jè ti-lè xi jts'ín ítjòn, chì'nda-lá koma jè xi iskan jts'ín.” ¹³ K'oaa s'ín tíchja Xojon-là

Nainá nga tsò: “Jè Jacob kjòtsjakeè-ná, kò jè Esau kòjtikeè-ná.”

¹⁴ ¿Mé xi kixoán? Nainá, ¿a mìtsà kjoa kixi xi s'ín? Majìn, mì k'oáá s'ín tjín. ¹⁵ Nainá k'oáá kitsò-la Moisés: “Kohimakeè-ná xi 'an mejèn-na nga kohimakeè, skoehima-ná jè xi mejèn-na nga skoehima.” ¹⁶ K'oáá s'ín tjín kjoa koi, mìtsà koi nga jñá mejèn-ná nga s'e-ná, nì mìtsà koi nga 'ño binchaàtsjiaá; jè Nainá tsjá-la kjondaà-la jñà xita xi jè mejèn-la mahimakeè. ¹⁷ K'oáá s'ín tichja Xojon-la Nainá nga kitsò-la Faraón: “Koi k'oas'ín kisikijna-lè nga xitaxá tijni ya naxandá Egipto mé-ne nga it'aà tsiji kokoaà nga'ño-na tikoa skoexkon-na xita nga tijtsa isò'nde.” ¹⁸ K'oáá s'ín s'ín Nainá, tjín-la kjohimatakòn it'aà ts'e xita xi jè mejèn-la; tikoáá ma-la sítajaàjìlìn inima-la xita xi jè mejèn-la nga kátasítajaàjìlìn inima-la.

¹⁹ Tanga tsà jì k'oá k'oín-ná: “Tsà k'oas'ín s'ín Nainá, ¿mé-ne jé bínè-la jñà xita?, nga nì yá xita xi koma kondra kjoì-la koni s'ín mejèn-la jè.” ²⁰ Tanga jì, xi taxkì xita-né, ¿yá-né jì, nga Nainá otikjoòkoi? Jngoò tijí xi xó kisindaà-ne, ¿a komaá kitso-la jè xi tsibíndaà: “Mé-ne k'oas'ín tsibíndaà-ná”? ²¹ ¿A mì tjí'nde-la jè xi ma-la bíndaà tijí nì'nde nga tije-ne ndási koìndaà jngoò-ne tijí xi tà k'e mochjeén k'e nga tjín s'eí koa koìndaà jngoò xi nachrjein nchijòn mochjeén?

²² Tsà Nainá mejèn-la tsakó kjoajti-la kò nga'ño-la, ¿a ch'o tjín nga kiskoòña kjoa it'aà ts'e xita xi tjoé-la kjo'in kò xi tjínè-la nga kjoehesòn? ²³ Mìtsà ch'o tjín; nga koi k'oas'ín kis'ìn-ne mé-ne nga ma tsakó kjoajeya-la xi it'aà tsaján

nga kjòhimakeè-ná. Nga jè tsibítsajnandaà-ná skanda tisa kjòtseé, mé-ne tikoá s'e-ná kjoajeya-la.

²⁴ Nainá k'oaá s'ín xó kiichja-ná. Tjín xita xi ya itjokàjìn ts'e xita judío; tikoáá tjín xita xi ya itjokàjìn ts'e xi taxki xita xi mìtsà xita judío.

²⁵ K'oaá s'ín tíchja xojon-la Oseas xita xi kiichja ngajo-la Nainá nga tsò:

Jè xi mìtsà naxandá-na ma nga sa ítjòn, naxandá ts'aán koma;

jè xi mì tjòkeè kijtseè nga sa ítjòn, tjòkeè skoeè.

²⁶ Ti ya-ne i'nde ñánda òki'mì-nò:

“Mìtsà naxandá ts'an xan-nò”,

“ixti-la Nainá xi tijnakon” k'óin-nò.

²⁷ Isaías, xita xi kiichjaya ngajo-la Nainá, k'oaá ti tsò it'aà ts'e naxandá Israel: “Nas'ín kjín jchán ma-ne ixti-la koni tsomì ts'e ndáchikon, tà chiba ma-ne xi kítjokàjìn kjo'in. ²⁸ Nga jè Na'en-ná nitoón sìikitasòn jè kjoakixi-la xi jye jè kitsjaà koni s'ín tjínè-la jña xita nga tíjtsa isò'nde.” ²⁹ Koni s'ín kitsò Isaías nga tisa ítjòn:

Jè Na'en-ná, xi tse nga'ño tjín-la,

tsà mìkiì kisìkinìngui chiba-ne tje-ná,

jyeé-la kisìkjesòn yije-ná

koni kisìkjo naxandá Sodoma kjo naxandá Gomorra.

³⁰ ¿Mé xi kixoán? Jña xi mìtsà xita judío, xi mìkiì fitjingui-la kjoa kixi, i'nde, jyeé xita kixi-né nga nguixkon Nainá tà koí kjoa-la nga mokjeín-la it'aà ts'e Nainá. ³¹ Tanga jña xita Israel xi fitjingui-la Kjoíxoma-la Moisés nga nchihótsji nga kixi kítsajna nguixkon Nainá mìkiì ijchòtjingui-la.

³² ¿Mé-ne nga k'oas'ín komà-ne? Koí kjoa-la nga mìkiì mokjeín-la it'aà ts'e Nainá. Tà k'oaá s'ín

'ñó tsohót'aàhikon nga ndaà tjín kjoa xi kis'iìn it'aà ts'e Kjoťíxoma. K'oa ma-ne [k'e nga j'ìi Cristo] yaá kisatíngui koni jngoò Ndajo xi kijnahikòn.
³³ Xojon-la Nainá k'oa s'ín tíchja [it'aà ts'e Cristo] nga tsò:

Ya nindoò Siòn kijnaá jngoaá ndajo xi kíjnahikòn,
 jngoò Ndajo xi satíngui xita,
 tanga jè xi kòkjeiín-la it'aà ts'e Ndajo jè mìkìi
 kosobà-la.

10

Mé xi s'eén nga kítsajnadeíí-ná xi kjoa ts'e jé-ná nga kixi kítsajnaá nguixkon Nainá

¹ Jñò ndí 'ndsè, xi nguì okixi, koií xi 'ñó mejèn-la inima-na kò xi 'ñó sìjèt'aà-la Nainá it'aà ts'e naxandá Israel, nga kàtitsajnadeíí kjoa ts'e jé-la. ² An be kixi-ná nga 'ñó mejèn-la nga ndaà skoexkón Nainá jñà xita Israel, tanga mìkìi mangàsòn kjohítsjeèn-la koni s'ín tjín jè kjohítsjeèn xi nguì kixi tjín. ³ Nga mìkìi fahas'en-jìin-la nga tà jngoò jè Nainá xi ma-la kixi síkítsajna xita. Tà jè xi mejèn-la nga tà jñà kixi sìkítsajna yijo-la. Majìn-la kjoé xi okixi-la Nainá xi ma-la kixi sìkìjina-ná. ⁴ Nga jè Cristo kisìkجهet'aà kjoa ts'e kjoťíxoma mé-ne nga s'e-la kjoa kixi ngats'ìi xita xi mokjeiín-la it'aà ts'e Nainá.

⁵ Jè Moisés, k'oa s'ín kiskìi it'aà ts'e xita xi mejèn-la kixi kítsajna it'aà ts'e kjoťíxoma nga tsò: “Jè xita xi sìkítasòn kjoťíxoma, it'aà ts'eé kjoťíxoma kíjnakon-ne.” ⁶ Tanga it'aà ts'e xita xi kixi kítsajna k'e nga mokjeiín-la, k'oa tsò: “Kì k'oa tsò inima-lè: ¿Yá xi kjìmijìn ngajmìi?” (Én koi

tsòyaá-ne nga mejèn-là kjinchrobàjen-kò Cristo.)
 7 Kò, kì k'oaá tsò inima-lè: “¿Yá xi ma kòis'en-jìin ì'nde ñánda nchisíkjeiín kjo'in jñà mik'en?” (Èn koi tsòyaá-ne nga mejèn-là skímiì'nga ìjngòò k'a-ne Cristo ya jjiìn-là mik'en.) 8 Tànga, ¿kó tsò-ìsa 'én-là Moisés? Tsò-ne: “Chrañàt'aà tìjna-lè jè 'én, yaá tìjna'a ndsoboì, yaá tìjnajiìn inima-lè.” K'oaá tsò 'én xi 'an chjaya xi mochjeén nga kòkjeiín-ná.
 9 Tsà ndsoboì kénajmí-ne nga Jesucristo, jè xi Na'èn-ná, kò tsà kò inima-lè kòkjeiín-lè nga Nainá kisíkjaáya-là ìt'aà ts'e kjoabiyaá, kijnandejì-né xi kjoa ts'e jé-lè. 10 Nga kòò inima-ná mokjeiín-ná mé-ne nga kixi kítsajnaá nguixkòn Nainá tìkoa kòò ndsobaa bènojmiá nga Jesucristo, jè xi Na'èn-ná, mé-ne nga kòma kítsajnandejì-ná xi kjoa ts'e jé-ná.

11 K'oas'ín tìchja Xojon-là Nainá nga tsò: “Ngats'ìi xi kòkjeiín-là ìt'aà ts'e Cristo mìkì kòsobà-là.”
 12 Jñà xita judío kò xi mìtsà xita judío, tà ngàsòn-né xi ìt'aà ts'e Nainá; nga tìjè-ne Cristo xi Na'èn tsò-là ngats'ìi xita. Jè kjondaà xi 'ñó tse tjin-là Cristo, jè tsjá-là ngats'ìi xita xi chjat'aà-là. 13 Nga k'oaá tì tsò Xojon-là Nainá: “Ngats'ìi xita xi kichjat'aà-là Na'èn-ná, kítsajnandejì-né xi kjoa ts'e jé-là.” 14 Tànga mìkì kòma kichjat'aà-là Cristo jè xita xi kj'eè kì mokjeiín-là. Kò mìkì kòkjeiín-là xita xi kj'eè mé 'én 'nchré ìt'aà ts'e Cristo. Kò mìkì kòma kji'nchré xita tsà mì yá xita tjin xi kèènojmi-là ìt'aà ts'e Cristo. 15 Kò jè xita xi kèènojmi 'én, mìkì kòma sìixá tsà mì yá xi sìikasén. K'oas'ín tìjt'aà xojon: “Mé tà ndaà-ne nga k'oas'ín binchimasòn jñà xita xi chjaya 'én ndaà-là Nainá

xi kjoa ts'e Cristo xi ts'e kjoa'nchán.”

¹⁶ Tanga mìtsà tà ngats'ìì xità Israel kisìkitasòn jè 'én ndaà-là Nainá xi kiì'nchré. Nga jè Isaías xità xi kiìchja ngajo-là Nainá, k'oáá kitsò: “Na'èn, ¿yá xi kòkjeiín-là 'én xi jìn kinokjoàya-jèn?” ¹⁷ K'oáá ma-ne, k'e nga mokjeiín-ná, yáá nchrobát'aà-ne k'e nga na'yá-lá 'én. K'oá jñà 'én xi na'yá, 'én ndaà-là Nainá xi kjoa ts'e Cristo-né.

¹⁸ Tanga, k'oáá xan: ¿A mìtsà kiì'nchré xità Israel jè 'én ndaà-là Nainá? Jon, kiì'nchré-né. Nga k'oáá tsò jè Xojon-là Nainá:

Kijndà isò'nde jyeé tsabísòn 'én-là.

Jyeé ijchò skanda ñánda fehet'aà-ne nangui.

¹⁹ Tìkoáá xan-ná: jñà xità Israel, ¿a mì kisijìin-là kjoa koi? Kisijìin-là. Jè xi tíjna ítjòn, k'oáá kitsò Moisés:

'An, k'oáá s'ín s'iaàn nga kàtachìnichà jñò jngoò naxandá xi mìtsà naxandá ts'an xan-là.

Kàtamajticha ít'aà ts'e naxandá xi chiba kjohítsjeèn tjín-là.

²⁰ Tìkoáá Isaías 'nó tsi'beé-là ikon nga kiìchja 'én-là Nainá nga kitsò:

Kisakò-là jñà xità xi mìkìl 'an tsohótsji-na.

Tsakó-là kjondaà-na jñà xità xi mìkìl 'an kiskònanguiya-na.

²¹ Tanga jè Isaías k'oáá s'ín kiskìl ít'aà ts'e xità Israel koni s'ín kitsò Nainá: “Nàchrjein nchijòn tsi-jmeé-là ndsaa nga kichjà'nchré-là jngoò naxandá xi kondrà kiì-là 'én-na nga mì kì kisìkitasòn.”

11

Kjohimatakòn xi tjin-la Nainá it'aà ts'e naxandá Israel

¹ 'Aán kjònanguia, jè Nainá, ¿a kitsjeiìn takòn naxandá-la Israel? Majìn, mì k'oáá s'ín tjin. 'An, tikoáá xita Israel-ná, tje-laá ma Abraham, xita xinguiáá ma xi ya nchrobát'aà-ne ts'e Benjamín. ² Nainá mìtsà tsachrjekàngui naxandá-la nga jye tjiìn-la nga tisa tàts'en-la kjoa nga ixti-la koma. ¿A mì tjiìn-nò koni tsò Xojon-la Nainá it'aà ts'e Elías nga k'oas'ín chjat'aà-la Nainá xi kondra ts'e Israel? Tsò: ³ “Na'èn, jña xita-lè xi kiichja ngajo-lè, jyeé kisik'en xita, koa jña i'nde tsjeè-lè jyeé kisikits'óna; tà 'an tajngoò tijnaa isa, tikoáá mejèn-la siik'en-na.” ⁴ Tanga k'oáá tsò 'én xi tsjá Nainá: “Majìn, mìtsà tà jì tajngoò tijni. Itoò jmiì ma-ne xita xi 'an títajnatjò-na xi k'j'eè tsà ya bincha-xkó'nchit'aà-la xkósòn-la Baal.” ⁵ Nachrjein i'ndeji tákó k'oáá s'ín ma, tjin isa xita Israel xi títajnatjò-la Nainá xi xó jaàjiìn-ne xi kjondaà ts'e. ⁶ Tsà tà kjondaà ts'eé Nainá nga k'oas'ín jaàjiìn xita, tsòyaá-ne mìtsà koi kjoa-la kjondaà xi kis'iìn. Tanga tsà koií kjoa-la kjondaà xi kis'iìn, mì-la tsà tì kjondaà-la Nainá kjòchjeén-ne nga kitjaàjiìn xita.

⁷ ¿Kó s'ín tjin kjoa? Tsòyaá-ne nga kjín xita Israel mìkiì ijchòtjingui-la jè kjoa xi tsohòtsji. Tanga kis'e i'nga xita xi xó jaàjiìn-ne Nainá xi jye ijchòtjingui-la. Jña xita xi i'nga, 'ñó kjòtájaàjiìn inima-la. ⁸ K'oáá s'ín tjit'aà Xojon-la Nainá nga tsò: “Nainá, kitsjaà-la nga kisijñòjiìn inima-la; jña xkon mìkiì tsejèn-la, kò líká-la, mìkiì 'nchré skanda

nachrjein i'ndeï.” ⁹ Jè xitaxá ítjòn David k'oaá ti kitsò:

Jè s'eí xi ochrje, tijè kàtama-ne ch'an nga kàtakaàngui, kàtasiya'ño na'ya,

kò tijña kàtasatíngui-ne mé-ne nga kàtas'e-la kjo'in.

¹⁰ Kàtasichjoà xkòn mé-ne nga mìkì kòtsejèn-la nga kjit'aà nachrjein kàtamatsit'in ít's'in.

¹¹ 'An kjònangui-ná, ¿a jngoò k'a chixòt'aà nangui jña xita Israel k'e nga kisatèngui? Majìn. Mì k'oaá s'in tjín kjoa. Jè kjoa-la nga mìkì kisikitasòn jña xita Israel, jña kitjoé-la xi mìtsà xita judío nga tsibìtsajnadejì xi kjoa ts'e jé-la. K'oaá s'in komà mé-ne nga jña xita judío kàtachinì-ne ít'aà ts'e kjondaà-la Nainá. ¹² Tsà jña xita isò'nde kisakò-la kjoanchinà-la Nainá k'e nga jña xita judío mìkì kisikitasòn-la Nainá kò kisichijà kjondaà-la, isaá ta 'ño ndaà s'e-la kjoa machikon-t'in jè isò'nde k'e nga jña xita judío ijngoò k'a skoé i'nde-la ya nguixkòn Nainá.

¹³ Jño chjàkò-nò xi mìtsà xita judío mì-nò. 'An kisixáya-na nga 'an kichjàjìn-la jña xi mìtsà xita judío. 'An beèxkón-ná xá xi kits'ìi-na. ¹⁴ Tsà koií nachrjein-la kochinì i'nga xita xinguiáa mé-ne nga tìkoa koma kìtsajnadejì-ne xi kjoa ts'e jé-la.

¹⁵ Tsà jña xita isò'nde kisakò-la kjoa'nchán ít'aà ts'e Nainá k'e nga jña xita judío itjokàngui, isaá tse kjondaà sakò-la jña xita judío k'e nga skoétjò ijngoò k'a-ne Nainá. Skanda k'oaá s'in komat'in koni jngoò xita xi jye k'en kò kjoaáya-la ít'aà ts'e kjoabiyaà. ¹⁶ Tsà tsjeè niño xi sindaà ítjòn nga kongatsja Nainá, tìkoaá tsjeè-né na'yo xi kochjeén nga sindaà niño k'e nga koma iskan. Tsà tsjeè ít'aà ts'e Nainá i'ma-la yá, jña chrja-la tìkoaá tsjeè-né.

17 Jñà x̣iṭa Israel, k'oáá s'ín ngaya-ḷa koni jngoò yá olivo ndaà xi kitiṭt'aà chrja-ḷa, koá ngaji k'oáá s'ín ngaya-ḷa koni chrja-ḷa yá olivo ij̣iìn ijñá nga ya kisikjoòkoji ya ngajo-ḷa chrja-ḷa yá olivo ndaà; k'oáá ma-ne nga ya ṭichjoí jè nga'ñó-ḷa i'ma-ḷa yá olivo ndaà. 18 Kì 'nga n̄ik̄j̄ni yijo-ḷè nga ya ṭitsakjoòkoji chrja-ḷa yá olivo ndaà. Ṭik̄its̄jiìn nga tà kisikjoòko-n̄è; mìts̄a j̄i 'biì-ḷa nga'ñó jñà i'ma-ḷa yá olivo ndaà, tà saà j̄i tsjá-ḷè nga'ñó jñà i'ma-ḷa yá olivo ndaà.

19 J̄i, k̄i k'oáá si: “Kitiṭt'aà chrja-ḷa yá olivo ndaà, nga 'an kisikjoòkoáa.” 20 T̄ik̄its̄jiìn koií kjoa-ḷa nga mìk̄i mokjeiín-ḷa nga kitiṭt'aà-ne. T̄anga j̄i koií kjoa-ḷa nga mokjeiín-ḷè nga ya t̄ijnat'eì. Kì 'ngaá beè-ḷa takòin, t̄iskón-ḷa Nainá. 21 Nainá, tsà mìk̄i kitsjaà'nde-ḷa jñà chrja-ḷa jè yá olivo ndaà nga ya k̄ijnakjoòko t̄ikoaá ngaji tsà mì t̄i k̄i mokjeiín-ḷè mì t̄i k̄i tsjá'nde-ḷè nga ya k̄ijnakjoòkoji. 22 Ch̄it̄sej̄en-ḷa Nainá, 'ñó ndaà x̣iṭa t̄anga t̄ikoaá jè xi mej̄en-ḷa nga ndaà k̄itasòn 'én xi ch̄ja. M̄ik̄i beè īma jñà x̣iṭa xi chinchat'aàxin-ḷa Nainá. T̄anga īt'aà ts̄iji t̄itsjá-ḷè k̄jondaà. Tà jè xi mochjeén nga k'oas'ín k̄ijni koni s'ín t̄j̄in k̄jondaà xi kitsjaà-ḷè. Tsà maj̄in t̄ikoa k̄otet'aà-ḷè koni jngoò chrja-ḷa yá. 23 Jñà x̣iṭa judío xi chrja-ḷa yá xi kitiṭt'aà, tsà k̄okjeiín ījngoò k'a-ḷa, k̄omaá sincháya-ne ī'nde-ḷa, nga Nainá t̄j̄in-ḷa nga'ñó, k̄omaá k̄ikjoò ījngoò k'a-ne. 24 J̄i, nga ya kitiṭt'aà-ne jñà yá olivo ij̄iìn ijñá koá kisikjoòkoji yá olivo ndaà na's'ín mìk̄i ya ok'in-ḷè. j̄isaá tà ndaà ok'in-ḷa nga jñà chrja-ḷa yá olivo xi xó kitjaàjiìn-ne nga sincháya ījngoò k'a-ne ī'nde-ḷa xi t̄ij̄è-ne yijo-ḷa yá!

²⁵ 'Ndsè, mejèn-na nga ndaà kàtasijiìn-nò kjoa'ma koi koni s'ín tjíndaà-la Nainá mé-ne nga mì 'ńó chjine kinachrje yijo-nò. Jè kjoa nga tjín i'nga xita Israel xi kjòtájaàjiìn inima-la nga mìkiì mokjeiìn-la, tanga skanda k'eé kòkjeiìn-la k'e nga jye kòkjeiìn yije-la xi mìtsà xita judío. ²⁶ K'e nga jye k'oas'ín koma, ngats'ìi xita Israel kítsajnandeíí-né xi kjoa ts'e jé-la, koni s'ín tíchja xojon nga tsò:

Yaá nindoò Sión kjinchrobà-ne xi ma-la sìikítsajnandeíí xita Israel xi kjoa ts'e jé-la, jè xi kjoaáxìn-la jé-la jña xita tje-la Jacob.

²⁷ Jè kjoa xi bìndaàjiìn-koaa

k'e nga kjoaáxìn-la jña jé xi tjín-la.

²⁸ Kjoa ts'e 'én ndaà-la Nainá xi kjoa ts'e Cristo, jña xita judío, kondra-laá ma Nainá mé-ne jño sakò-nò kjondaà. Tanga jè kjoa nga xó kitjaàjiìn-ne xita koi, tákó matsjakeè Nainá nga jye kos'ín kitsjaà-la tso'ba jña xita jchínga kjiìn-la. ²⁹ Nainá mìkiì faáxìn kjòtjò xi tsjá, tikoaa mìkiì faáxìn 'én xi chja-ná.

³⁰ Jño, k'oaa tís'ín ki'nè nga sa kjòtseé; mìkiì kinikitasòn-la Nainá, tanga i'ndeí jyeé kisakò-nò kjohimatakòn, koií ngatjì-la nga mìkiì kisikitasòn jña xita judío. ³¹ Nachrjein i'ndeí jña xita judío mìkiì síkitasòn-la Nainá. Tanga tà koi-né nga jè Nainá tjín-la kjohimatakòn xi it'aà tsajòn mé-ne jña xita koi tikoaa s'e-la kjohimatakòn ts'e Nainá.

³² Nainá, k'oaa tsò nga ngats'ìi xita judío, kò xi mìtsà xita judío, mìkiì síkitasòn-la nga jè xi mejèn-la Nainá nga ngàsòn ngáya kohimakeè ngats'ìi xita.

³³ ¡Mé tà 'ńó tse ma kjoanchiná xi tjín-la Nainá, kò 'ńó tse kjoachjine tjín-la kò kjohítsjeèn-la! Nijngoò xita xi machiya-la kós'ín kosòn-la k'e

nga bínɔààjìnn kò kós'ín t́jín ndiyá-là. ³⁴ ¿Yá xi beè kós'ín t́jín kjohítsjeèn-là Nainá? Mì yá xi koma-là sìikíchiya-là Na'ènná. ³⁵ ¿Yá xítà xi jè kisikìña ítjòn-là xi mochjeén-là Nainá mé-ne nga jè sìikátji ngajo-là? ³⁶ It'aà ts'eé Nainá nchrobát'aà-ne ngats'ìì tsojmì xi t́jín, t́koà it'aà ts'e-né nga títsakon, kò k'oàá s'ín mochjeén nga jeya kíjna.

Nainá, kàtas'e-là kjoajeya nítà mé nàchrjein-ne. K'oas'ín kàtama.

12

Mé xi s'eén nga tsjeè sijchá yijo-ná koni s'ín sasén-là Nainá

¹ K'oàá ma-ne 'ndsè, nga tse kjohimatakòn t́jín-là Nainá xi it'aà tsaján, 'an bitsi'bà-nò nga k'oas'ín t́ngatsja yijo-nò it'aà ts'e Nainá koni jngoò kjotjò xi t́jnakon, xi tsjeè t́jín, xi ndaà sasén-là Nainá; nga nguì kò inima-nò kò kjohítsjeèn-nò jeya sìkíjna Nainá. ² Kì k'oas'ín onguíkò yijo-nò koni s'ín t́jín kjotíxoma-là isò'nde. Tíxítseyà kjohítsjeèn-nò nga kàtatjìya-nò koni s'ín títšanìjchá yijo-nò mé-ne nga jcha-nò mé xi mejèn-là Nainá it'aà tsajòn, jña kjoa xi ndaà t́jín, xi nguì t́jíkixi, xi jè ndaà sasén-là.

³ It'aà ts'e xá xi 'an kitjoé kjotjò-na, k'oàá xan-nò nga jngoò ìjngoò, kì 'nga onguíkò kjohítsjeèn-nò koni s'ín t́jínè-là nga sìkítsjeèn; tà saà ndaà t́kítsjeèn koni s'ín ok'ín-là kjondaà xi kitsjaà-nò Nainá k'e nga kòkjeiín-nò it'aà ts'e Cristo. ⁴ Koni s'ín t́jín yijo-ná nga kjìn skoya t́jín-là tanga kakj'eíí kakj'eíí xá t́jín-là nga ìjngoò ìjngoò skoya. ⁵ K'oàá s'ín ma it'aà tsaján nga kjìn ma-ná, tanga xi it'aà

ts'e Cristo tà jngoò ma-ná nga ìjngoò ìjngoá; k'oaá s'ín k̲indoba'ñoá xinguiáá koni s'ín kitsobà'ño xíkjín yijo-ná.

⁶ Koni s'ín kjòmejèn-là Nainá jye kitsjaà-ná xá xi s'eén nga jngoò ìjngoá. Jngoò x̲ita, tsà jè xá kitjoé-là nga x̲ita k̲ichjayajìn-là, k'oaá s'ín k̲atasíkjeén koni s'ín mokjeiín-là. ⁷ Tsà jè xá kitjoé-là nga x̲ita k̲osiko, k'oaá s'ín k̲atasíkjeén nga ndaà k̲atasìko x̲ita. O xi jè xá kitjoé-là nga k̲okòya, k'oas'ín k̲atasíkjeén nga ndaà k̲atakóya. ⁸ Jè xi kitjoé-là xá nga sìjehikon x̲ita, k'oas'ín k̲atas'ín. Jè xi ma-là sìka'bí tsojmì, nguì koó inima-là k̲atasíka'bí; jè xi xá ítjòn kjòngatsja, ndaà k̲atasíkitasòn; jè xi síchjât'aà-là j̲nà x̲ita ima, koó kjotsja-là k̲atasíchjât'aà-là.

⁹ Nguì koó inima-nó t̲itsjacha xinguiò. T̲ijticha kjoa xi ch'o t̲jín. Koií tanguít̲jinguì-là kjoa xi ndaà t̲jín. ¹⁰ Koó kjotsja-nò t̲itsjacha xinguiò nga 'ndsè chiba. Ìsa ndaà jchaxkón x̲ita xinguiò xi i'nga; j̲nà t̲ikítsajna ítjòn nga jngoò ìjngoò.

¹¹ Kì ts'eè 'nè xi xá ts'e Nainá. Nguì koó inima-nò t̲ixá-là Na'èn-ná.

¹² Tsja te-lá takòn jè kjoa xi chiñà-là. Ko inima-nò k̲atachíkjoako-nò kjo'in xi t̲itsanìkjioón. N̲achrjein nchijòn t̲itsi'ba-là Nainá.

¹³ T̲jii-là mé xi mochjeén-là j̲nà x̲ita tsjeè-là Cristo. Chjoétjò x̲ita xi bijchó ya ni'ya-nò.

¹⁴ T̲ijét'aà-là Nainá nga k̲atasíchikon-t'in j̲nà x̲ita xi ch'o síko-nò; kì k'oaá s'ín n̲ijét'aà-là nga kjo'in tsjá-là.

¹⁵ T̲itsjakoo j̲nà x̲ita xi tsja t̲jín-là. Ch̲ihindáyakoo j̲nà xi nchikjindáya.

16 Tà jngoò t'een kjohítsjeèn-nò. Kì 'nga ikon 'nè yijo-nò, ya tsjahijtakoo jñà xita ima. Kì 'ño chjine nachrjenguioò yijo-nò.

17 Jñà xita xi ch'o síko-nò, kì ch'o nìkoo ngajo-nò. Kjit'aà nachrjein ndaà t'een nga nguixkon ngats'iì xita. 18 Skanda ñánda sakó'nde-nò, jñò tjínè-nò nga 'nchán titsajnakoo ngats'iì xita. 19 Ndí 'ndsè xi matsjake-nò, k'e nga mé xi mat'ioòn, kì jñò 'nè ngajo-nò. Tsja Nainá tikijnaya kjoa-nò mé-ne nga jè tsjá-ne kjo'in. K'oaá s'in tíchja Xojon-la Nainá nga tsò: “Tsò Na'èn-ná: 'Aán oko-na nga kındaajìin-la xita, 'aán tsja-la chjí-la.” 20 K'oaá ma-ne, tsà jè kondra-lè, tsà tsjìn tsojmì xi kine, jii tjii-la; tsà xindá-la, tjii-la nandá nga kàt'iì. K'e nga koa sikoji, kosobà ti'biì-la kondra-lè, chiba-la kohini isén-la koni xá'í. 21 Jè kjoa xi ch'o tjín, kì jè síkijne-nò; tikoaa-ne jè kàtítasòn xi kjondaà, mé-ne nga sikijne-là kjoa xi ch'o tjín.

13

Mé kjoa-ne nga nìkitasòn-lá xi xitaxá títsajna

1 Ngats'iì xita kàtasíkitasòn-la xi xitaxá títsajna, nga Nainá kitsjaà-la kjotíxoma. Jñà xi xitaxá títsajna, Nainá kitsjaà-la xá. 2 Jñà xita xi bìtsajna tájaà-la kjotíxoma-la xitaxá, kondraá bìtsajna-la jñà xita xi Nainá kitsjaà-la xá. Jñà xita koi, ti yijo-laá túbínè-la kjo'in. 3 Jñà xitaxá mìtsà koi xá títsajna-ne nga jñà kìnchaxkón-la xita xi ndaà s'in, jñà-né xita xi ch'o tjín kjoa xi s'in. Tsà mejèn-lè nga mikì kiskón-la xitaxá, ndaà t'jin, ko jñà xitaxá ndaà sìikijna-lè. 4 Jñà xi xitaxá tjín-la, xá ts'e Nainá nchisíkitasòn, mé-ne nga ndaà kijna-ne.

Tanga tsà ch'o tjin kjoa xi tì'nì, tiskón-la xi xitaxá tjin-la, nga tji'nde-la nga tsjaà-lè kjo'in. Nga xá-la Nainá nchis'in k'e nga bínààjiin kjoa kò nga tsjá-la kjo'in jñà xita xi ch'o s'in. ⁵ K'oaá ma-ne nga mochjeén-né nga ndaà sikitasòn-lá jñà xi xitaxá títsajna, mìtsà tà koi-ne nga kjo'in tsjá-ná; koi-né nga xó k'oas'in beè-la takoán nga tjinè-ná nga sikitasoán. ⁶ Koií kjoa-la nga tikoá machjí ton sá, nga jñà xitaxá k'oaá s'in nchisikitasòn-la Nainá kò kjit'aà nachrjein koatjin xá xi nchis'in.

⁷ Tichjió yije mé xi kitjen-nò. Jè xi kitjen-la ton sá, kàtíchjí. Jè xi kitjen-la tsojmì xi machjítjì, kàtíchjítjì. Jè xita xi mochjeén-la nga jchaxkón, kàtayaxkón. Jè xita xi mochjeén-la nga ndaà kijná, ndaà tikijná. ⁸ Kì mé xi jmeèt'ioòn yijo-nò. Tanga kitjeén-nò ts'e kjoatjòcha it'aà ts'e xita xinguioo. Nga jè xi matsjakeè xíkjin, jyeé kisikitasòn yije Kjotixoma. ⁹ Jñà kjotixoma tsò-ne: “Kì kjoa chijngui 'nì, kì xita nìk'in, kì chijé 'nì, kì 'én ndiso nokjoì, kì maxitakòn-chiì xinguji.” Ngats'ii kjotixoma koi, kò xi kj'eij, yaá mangàsòn yije jè kjotixoma xi tsò: “Titsjachi xita xinguji koni tsà ti yijo tsiji-ne.” ¹⁰ Jè xi matsjakeè xíkjin, mìtsà ch'o síkò xita xíkjin. Jè xi matsjakeè xíkjin, jyeé ndaà tísikitasòn Kjotixoma.

¹¹ K'e nga k'oas'in s'een yijeé kjoa koi, jcha-ná nachrjein i'ndeí mé kjoa xi tíma nga jye ijchò chiba-la nga sikja-lá yijo-ná nga titsafè. Koni k'e nga sà kòkjeín-ná, jye 'ñó kjòchrañà'taà nachrjein nga kitsajnandiaá kjoa ts'e jé-ná. ¹² Nitjen, jyeé tífahato, jyeé tímachrañà nachrjein nga s'e isén nga kitjojen iñgoò k'a Na'èn-ná. Kinachrjenguiaá ngats'ii kjoa xi ma ñánda nga jñò choòn kò chjoé

nga'ñó-la Nainá koni s'ín mochjeén ñánda iseèn choòn koni tsà kicha ts'e soldado. ¹³ K'oaá s'ín iseèn kitjá koni nàchrjein nga ndaà sijchá yijo-ná. Mì kì mochjeén nga taxkì chjineé tsojmì kò nga mach'iaá. Mìkì mochjeén nga íchjín kjóhijtakoáá, kò mì kì ma taxkì sikoáá yijo-ná. Mìkì mochjeén nga xita kixkàn-koáá kò mìkì mochjeén nga kjoaxitakòn kichjà-lá xinguiáá. ¹⁴ K'oaá s'ín tìjchá yijo-nò koni s'ín kis'iìn jè Nà'èn-ná Jesucristo, kì kii nìkitasòn-là yijo-nò kjoa ch'o xi síjé.

14

K'e nga mìkì mangàsòn kjohítsjeèn-ná it'aà ts'e kjoa xi mì xó kii tji'nde-ná nga s'eén

¹ Chjoétjò xita xinguiò xi mìkì tìjngoò ikon mé kjoa xi tji'nde-là nga s'iìn; kì chibàya-nò jña kjoa xi mìkì mangàsòn kjohítsjeèn-nò. ² Tjín xita xi k'oas'ín mokjeiín-là nga ma chine yije tsojmì xi tjín, tìkoá tjín xita xi mìkì mokjeiín-là tsà ma chine yije tsojmì xi tjín. Tà jña tsojmì xi nangui síjchá kine. ³ Jè xi kine yije tsojmì xi ma chine mìkì koma kochrjekàngui jè xi mìkì ma-là kine yije tsojmì; kò jè xi mìkì ma-là kine yije tsojmì, mìkì koma kichjajno-là jè xi ma-là kine yije tsojmì xi tjín, nga Nainá jyeé kiskoétjò nga ki'ndí-là ma. ⁴ ¿Yá-né jì nga nìkindìi chì'nda xi mìtsà tsiji? Nga chì'nda ts'e Nainá-né. Jè chì'nda jè, kinda ts'eé nei-là tsà kixi tìjna kò tsà mì kixi tìjna. Tanga kixi kìjna, nga jè Nà'èn-ná tjín-là nga'ño nga kixi sìkìjna.

⁵ Tjín xita xi tsò: tjín nàchrjein xi isa xkón. Tìkoá tjín xi tsò: Nàchrjein, tà ngàsòn ngaya-né nga nàchrjein nchijòn. Nga jngoò òjngoò xita, k'oaá s'ín

ndaà katíjngoò-la ikon koni s'ín síkítsjeèn. ⁶ Jñà xīta xi faájìl̄n jngoò nāchrjein nga beèxkón, k'oaá s'ín nga jeya síkijna Na'èn-ná; koa jñà xīta xi tsò nga ta ngàsòn ngáya nāchrjein, tīkoaá k'oaá s'ín s'ín nga tīkoa jeya síkijna Na'èn-ná. Jñà xīta xi kine yije tsojmì, it'aà ts'e Na'èn-ná kine, nga tsjá-la kjōndaà Na'èn-ná k'e nga kine; k'oa jñà xīta xi tsò nga tjin tsojmì xi mikìl̄ ma chine, tīkoaá it'aà ts'eé Na'èn-ná nga mikìl̄ kine tsojmì, kō tīkoaá tsjá-la kjōndaà Na'èn-ná.

⁷ Jñá, k'e nga titsajnakoaán, mitsà koi xá titsajnakon-ná xi ta kjōndaà tsaján. Kō k'e nga kiyá, mitsà ta kjōndaà tsaján kinchátsjiaá nga kiyá. ⁸ Tanga k'e nga titsajnakoaán, koií xá titsajnakoaán xi kjōndaà ts'e Na'èn-ná. Kō nga kiyá, tīkoaá koií xá kiyá-aná xi kjōndaà ts'e Na'èn-ná. K'oaá ma-ne tsà titsajnakoaán kō tsà kiyá kjōndaà ts'e Na'èn-ná nga ts'e tsò-ná. ⁹ Koií kjoa-la nga k'en Cristo koa jaáya-la nga tsibìjnakon-né, mé-ne nga jè kōma-ne Nei-la jñà xīta xi biyaà kō xi titsajnakon.

¹⁰ Tanga jì xi nokjoàjno-la 'ndsì, ¿mé-ne koa'nè-ne? Tīkoaá jì xi nachrjekàngui 'ndsì, ¿mé-ne nachrjekàngui-ne? Nga ngats'ìi-ná kijchò kinchanguiaá ndsoko Cristo ñánda nga jè tíhotíxoma. ¹¹ K'oaá s'ín tíchja Xojon-la Nainá nga tsò:

Tsò Na'én-ná: 'An tìjnākon-ná,
ngats'ìi xīta kìncha-xkó'nchit'aà-na
kō ngats'ìi xīta skoexkón Nainá.

¹² Ngats'iaá k'oi-lá kindā Nainá mé kjoa xi ki'né nga tsitsajnaá isò'nde.

¹³ K'oaá ma-ne nga mì tì xinguiáá kìnókjoajno-lá; jñò, ta saá ndaà tìkítsjeèn nga nímé xi s'een xi s̀ikits'ón-jìin koni s'ín mokjeiín-là xinguiqo mé-ne nga mì jé skajìin ìjngoò k'a-ne. ¹⁴ 'Añ ndaà tìjngoò takoàn ìt'aà ts'e Na'èn-ná Jesús nga kixi kjoa nga tsjìn tsojmì xi xkón tjin nga mìkì ma chine; tanga jè xita xi k'oas'ín s̀ikítsjeèn nga tjin tsojmì xi xkón tjin nga mìkì ma chine, xkón tjin-là ìt'aà ts'e tsà skine. ¹⁵ Tanga tsà ta koií kjoa-là ts'e tsojmì xi chinii, jè 'ndsì ch'o ma-là, jè kjoa xi tì'nì mìtsà tì kjoatjòcha-ne; kì kii bìi'ndi nga jè 'ndsì xi Cristo k'en ngajo-là k̀its'ón-jìin-là xi tà kjoa ts'e tsojmì xi chinii. ¹⁶ Kì k'oaá s'ín 'nè mé-ne nga mì xita kichjajno-nò ìt'aà ts'e kjoa xi titsa'nè nga k'oas'ín mokjeiín-nò nga ndaà tjin. ¹⁷ K'e nga jè Nainá tìhotíxoma-ná mìtsà jè xi isa 'ñó chjì-là mé xi s'ioaá ko mé xi chineé. Jè xi 'ñó mochjeèn nga kixi k̀itsajnaá, 'nchán sijchá yijo-ná, ko tsja k'oé-là inima-ná; koi kjoa xi tsjá Inima Tsjeè-là Nainá. ¹⁸ Jè xi k'oas'ín s̀ikitasòn kjoa koi k'e nga síxá-là Cristo, ndaà sasén-là nguixkon Nainá, tìkoaá ndaà bijna nga nguixkon xita.

¹⁹ K'oaá s'ín kjitjingui-là kjoa xi 'nchán s̀ikíjna-ná ko kjoa xi 'bì-lá nga'ñó xinguiáá nga jngoò jn-goaa koni s'ín mokjeiín-ná. ²⁰ Kì xá-là Nainá ǹikits'ón-jìin-là xi ta kjoa ts'e tsojmì xi ma chine. Kixij kjoa, ngats'ii tsojmì xi tjin, tsjeè-né. Tanga jè xi ch'o tjin k'e nga ta koi kjoa-là tsojmì xi chineé bits'ón-jìin-là kjoa xi mokjeiín-là ìt'aà ts'e Nainá jñà xita xi kj'eíí. ²¹ Isaá ndaà-ne nga mì yijo chjineé, nga mì xán s'ioaá, nga nímé kjoa xi s'een jè xi s̀ikits'ón-jìin-là jè 'ndsì nga sakó-là jé. ²² Koni s'ín

mokjeiín-lè ìt'aà ts'e kjoa koi, tà jìí tíjìin takoìn kò Nainá. 1 Mé ta ndaà-là jè xi mì kjo'in bínè-là yijo-là k'e nga tíjngoò ikon nga ndaà tjín kjoa xi s'ín! 23 Jè xi jò tjín-là k'e nga mé tsojmì xi kine, jé tihónè-là yijo-là nga mìkìì tjíjngoò ikon tsojmì xi kine. Tsà mìkìì tjíjngoò takoán k'e nga mé kjoa xi s'èén, jé titsahonè-lá yijo-ná.

15

1 Jñá xi jye kixì mokjeiín-ná ìt'aà ts'e kjoa xi tjí'nde-ná mé xi s'èén, mochjeén-né nga tìkoa kichìkjoako-ná jñà xita xi k'oas'ín mokjeiín-là nga mìkìì tjí'nde-là mé kjoa xi s'ìin. Mìtsà tà jñà kjoa xi ndaà sasén-ná kìnchátsjiaá. 2 Nga jngoò ìjngoáá, mochjeén-né nga k'oas'ín s'èén jè kjoa xi sasén-là jñà xita xinguiáá xi kjoandaà ts'e, mé-ne nga kijin-isa kjohítsjeèn-là jè kjoa xi mokjeiín-là. 3 Nga tìkoa jè Cristo mìtsà jè tsohótsji kjoa xi sasén-là yijo-là, tà saá ìt'aà ts'eé tsitasòn koni s'ín tjít'aà xojon ts'e Salmo, nga tsò: “Én ch'o xi jì kùichajno-lè, 'aán kiskaàt'aà-na.” 4 Jñà 'én xi kitjei nga sa kjòtseé, koií xá kitjei-ne nga kòkòya-ná mé-ne nga ìt'aà ts'e Xojon-là Nainá, tseé s'èén takoán tìkoa s'e-là kjoa'nchán inìma-ná, mé-ne nga koma chíñakjoa-lá ìt'aà ts'e Nainá. 5 Nainá xi ma-là tsjá-ná kjoatsetakòn kò xi ma-là sí'nchán-jìin inìma-ná, k'oas'ín jngoò kjohítsjeèn kàtatsjá-nò nga jngoò ìjngoò koni tsò Cristo Jesús, 6 mé-ne ngats'ioò ngàsòn jngoò jta jeya tìkíjna Nainá, Na'èn-là Jesu-cristo xi otíxoma-ná.

7 Koií kjoa-là k'oas'ín choétjò xinguiqo nga jngoò ìjngoò koni s'ín kiskoétjò-nò Cristo mé-ne nga jeya kíjna-ne Nainá. 8 K'oáá xán-nò, jè Cristo Jesús,

koií xá j'ìi-ne nga j'ìi síxájìin-là xítà judío xi tít'aà chiba-là kjoa ts'e circuncisión mé-ne nga tsakó-ne kjoakixi-là Nainá tikoá síkitasòn koni s'ín jye kits-jaà-là tso'ba Nainá jñà xítà jchínga kjiin-là. ⁹ Tikoá koií xá j'ìi-ne mé-ne nga jñà xi mìtsà xítà judío jeya sìkíjna Nainá it'aà ts'e kjohimatakòn xi tjin-là Nainá koni s'ín tichja Xojon-là Nainá, nga tsò: Koií kjoa-là nga jeya sìkíjna-lè jjiin-là xítà naxandá xi mìtsà xítà judío.

It'aà tsiji sé-lè sò xi ndaà tsò.

¹⁰ Ìjngoò k'a tít'aà xojon ñánda nga tsò:

Jñò xi mìtsà xítà judío 'mì-nò,
tsjaá t'è-lá takòn kò xítà naxandá-là Nainá.

¹¹ Ìjngoò k'a tít'aà xojon ñánda tsò:

Jñò ngats'ioò xi mìtsà xítà judío 'mì-nò,
jeya tìkíjna Na'èn-ná,
ngats'ioò xi naxandá 'mì-nò jeya tìnachrjeè Nainá.

¹² Ìjngoò k'a tít'aà xojon ts'e Isaías ñánda tsò:

Jè tje-là Isaí kítjot'aà jngoò-ne jts'én-là xi
kotìxoma-là jñà xi mìtsà xítà judío,
kò jè jts'én jè kòt'aà ikon nga skóña-kjoa-là.

¹³ Nainá xi tsjá nga chiñakjoá, kàtatsjá yije-nò
kjotsja kò kjoa'nchán nga mokjeiín-nò it'aà ts'e,
mé-ne nga isa ndaà chíñakjoa isaa xi kò nga'ño-là
Inima Tsjeè-là Nainá.

Pablo chi'nda-là Jesucristo

¹⁴ Tanga ndí 'ndsè, 'an tìjngoò takoàn xi it'aà
tsajòn xi tijnò-nò tjin-nò kjondaà tikoá machiya-nò
nga koma tijnò sìkixiya-là xítà xinguiò nga
ìjngoò jngoò. ¹⁵ Ndí 'ndsè, 'ño tibeè-là takoàn
nga tìkjìi-nò xojon jè; tichja kixi-nò, mé-ne nga
mikiì jchàajìin-nò koni tsò xojon jè. Koií k'oas'ín

tìsikítsjeèn-nò nga 'an kitjoé-na kjoṭjò-la Nainá k'e nga kitsjaà-na xá, ¹⁶ mé-ne nga 'an koma-na chí'nda-la Jesucristo it'aà ts'e xi mìtsà xita judío. Sìxákoaa 'én ndaà-la Nainá, mé-ne jña xi mìtsà xita judío ndaà sasén takòn-nè Nainá koni jngoò kjoṭjò xi 'ñó sasén-la Nainá nga it'aà ts'e Inima Tsjeè-la Nainá jyeé kjòtsjeè.

¹⁷ 'An tjín-na mé kjoa-ne nga matsja-na it'aà ts'e Cristo ts'e xá xi tìs'iaàn. ¹⁸ Nì mé kjoa tjín xi ma'ñót'aà takoàn nga ma chjà, ta jè kjoa ts'e Cristo nga 'an s'kjeén-na nga sìxákoaa jña xi mìtsà xita judío mé-ne nga koma s'kitasòn-la Nainá. K'oaa s'ín kis'iaàn it'aà ts'e 'én xi kichjà kò it'aà ts'e xá xi kis'iaàn, ¹⁹ kò it'aà ts'e kjoxkón xi okó kjoajeya-la Nainá kò it'aà ts'e nga'ñó-la Inima Tsjeè-la Nainá. Jyeé ndaà kisìngásoàn 'én ndaà-la Nainá xi kjoa ts'e Cristo, tsibìts'iaḱo-na ján Jerusalén kóhokji nga jngoò itjandi-la skanda ján Ilírico. ²⁰ K'oaa s'ín tsibìnè-la yijo-na nga kichjàya 'én ndaà-la Nainá xi kjoa ts'e Cristo ya i'nde ñánda k'èè yá bénojmiya it'aà ts'e Cristo, mé-ne nga mì 'an kokoòya ndaà-la xita xi k'jeí xi jye tsakóya ítjòn-la it'aà ts'e Cristo.

²¹ Koni s'ín tjít'aà Xojon-la Nainá nga tsò:
Skoé-né jña xita xi mì yá tsibénojmi-la it'aà ts'e;
kochiyaá-la jña xita xi k'jeè mé 'én 'nchré xi it'aà ts'e.

Kós'ín tìsikítsjeèn Pablo nga mejèn-la kjoì Roma

²² Kò kjìn k'a mejèn-na fikon-nò tanga jña xá xi 'an tìs'iaàn i i'nde jé mìkì tjo'nde-na nga ma fia. ²³ Tanga i'ndeì nga jye jyehet'aà xá-na ijndé, kò tikoà kò kjìn nó tjín-la nga mejèn fikon-nò, ²⁴ k'oaa s'ín tìsikítsjeèn, k'e nga kjián ján España,

k'eé kichjàto-nò mé-ne nga skoexkon-nò. K'e nga jye chibá jngoò tjoà koma kinchako-ná nga koma kjián ñánda nga tífia. ²⁵ Tanga i'ndeí ján Jerusalén tífia, nga tífiko jngoò-la nga'ño jña xita-la Cristo xi ya títsajna. ²⁶ Nga jña xita naxandá-la Nainá xi títsajna Macedonia ko Acaya kjòtsja ts'e-né nga tsibíxkó chiba ton koni jngoò nga'ño xi kjòtjò ts'e xita ima naxandá-la Cristo xi títsajna ján Jerusalén. ²⁷ Ngui kjòtsja ts'e-né koni s'in kis'iin jña xita koi. Nga tjen-t'in-la kjondaà. Tsà jña xita xi mitsà xita judío k'oaà s'in kisakò-la kjondaà ya ijiin inima-la it'aà ts'e xi ngui xita judío, tikoàà tjinè-la jña xi mitsà xita judío nga kinchako nga tsjá-la tsojmì xi mochjeén-la. ²⁸ K'e nga jye kjoehet'aà kjoa koi nga jye sìngatsja jè ton xi kjòxkó, ikjoàn skotsejèn jngoò tjò-nò, k'eé kjián ján España. ²⁹ Be-ná nga 'ño ndaà sìichikon-t'in-ná Cristo k'e nga kichokon-nò.

³⁰ Tanga jño ndí 'ndsè, bìtsi'bà-nò it'aà ts'e Na'en-ná Jesucristo ko it'aà ts'e kjoatjòcha xi tsjá-ná Inima Tsjeè-la Nainá, tinókjoat'aà-la Nainá xi it'aà ts'an, ³¹ mé-ne nga kosiko-na Nainá it'aà ts'e xita xi mìkì mokjeiín-la xi títsajna ján Judea, ko mé-ne nga jè ton xi tífiko-la xita-la Cristo xi títsajna ján Jerusalén ndaà kàtasasén-la, ³² mé-ne nga, tsà k'oas'ín mejèn-la Nainá, nga ko kjòtsja-na kichokon-nò, tikoà koma ndaà sìkjáya chiba nachrjein-ko-nò. ³³ Jè Nainá xi tsjá-ná kjoa'nchán kàtijnako-nò ngats'ioò. K'oas'ín kàtama.

16

Kós'ín kisihixat'aà Pablo ngats'ii xita naxandá-la Nainá xi títsajna Roma

¹ It'aà tsajòn sìngatsja-nò jè tichjaá Febe, jè xi síchját'aà naxandá-la Cristo xi ya tíjna Cencia; ² ndaà chjoétjò xita jè nga xinguiáá ma nga tikoáá mokjeín-la it'aà ts'e Na'en-ná nga k'oaá s'ín ok'ín-la xi xita-la Cristo. Tichját'aà-là nita mé xi kochjeén-la nga 'ño kjín xita tsasìko, tikoá 'an kisichját'aà-na.

³ Tiixat'eì jè Priscila ko Aquila, jña xita xi taña nixákjoò-jen it'aà ts'e Cristo Jesús. ⁴ Jña xita koi kjomeè kinik'en xi kjoa ts'an. Mìtsà tà 'an xi tsjaà-la kjondaà tikoá tsjá-la kjondaà ngats'ìi xita naxandá-la Cristo xi mìtsà xita judío. ⁵ Tikoá tiixat'eì jña xita naxandá-la Cristo xi maxkóya ya ni'ya-la Priscila ko Aquila. Tiixat'eì jè Epeneto xi 'ño matsjake nga jè kòkjeín ítjòn-la it'aà ts'e Cristo ya i'nde Acaya. ⁶ Tiixat'eì jè María, chjoón xi 'ño ndaà kisíxá it'aà tsajòn. ⁷ Tiixat'eì jè Andrónico ko Junias, xi xinguiáá ma nga taña tsitsajna'ya-jen ndayá. Jña xita xi tsibíxáya-la Cristo 'ño matsjakeè xita koi. Ko ìsa ítjòn kijtseèxkon 'én-la Cristo koni 'an.

⁸ Tiixat'eì jè Amplias, jè xita xi 'an 'ño matsjake it'aà ts'e Na'en-ná. ⁹ Tiixat'eì jè Urbano xi taña síxáko-na it'aà ts'e Cristo Jesús ko jè Estaquis xi 'an 'ño matsjake. ¹⁰ Tiixat'eì jè Apeles xi ndaà kixi mokjeín-la it'aà ts'e Cristo. Tiixat'eì jña xita xíkjin xi ya títsajna ni'ya-la jè Aristóbulo. ¹¹ Tiixat'eì jè Herodiòn xi xinguiáá ma. Tiixat'eì jña xita xíkjin xi ya títsajna ni'ya-la Narciso xi Na'en-ná títsajnakò. ¹² Tiixat'eì jè Trifena ko Trifosa jña íchjin xi 'ño síxá-la Na'en-ná, ko tichjaá Pérsida xi 'ño matsjachaá nga tikoá ndaà síxá-la Nainá.

13 T̃iixat'eì jè Rufo xi xó jaàjiìn-ne Nainá. Kò nea-là xi 'an k'oa t̃is'ín beètakoàn koni tsà nea-na.

14 T̃iixat'eì jè Asíncrito, jè Flegonte, jè Hermas, jè Patrobas, jè Hermes kò x̃ita 'ndseé xi ya t̃ítsajnakò.

15 T̃iixat'eì jè Filólogo, jè Julia, jè Nereo kò ndichja, kò Olimpás, ngats'ìi x̃ita xi mokjeiìn-là ìt'aà ts'e Cristo xi ya t̃ítsajnakò.

16 J̃nò nga jngoò ìjngoò, k'e nga s̃ixat'aà xinguiò, nguì kòó iñima-nò t̃iixat'aà xinguiò nga kò okixi-nò. Ngats'ìi x̃ita naxandá-là Cristo xi ì t̃ítsajna s̃ihixat'aà-nò.

17 Ndí 'ndsè k'oaá s'ín bìtsi'bà-nò nga ch̃ítsejèn-là j̃nà x̃ita xi s̃ijòya kò xi s̃íkits'ón-j̃iìn koni s'ín mokjeiìn-nò, j̃nà xi kondra f'ìi-là kjoh̃ítsjeèn koni s'ín kichita'ya j̃nò. T̃inchat'aàxìn-là j̃nà x̃ita koi.

18 J̃nà x̃ita koi, mìtsà Na'èn-ná Jesucristo s̃ixá-là, tà yijo-laá s̃ixátjì. 'Én sin 'én ndaà chja nga konachan-là x̃ita xi mìkiì ndaà machiya-là. 19 'An, matsjaá-na ìt'aà tsajòn nga jye ndaà na'ya-nò nga ndaà ñikitasòn. T̃anga 'an mejèn-na nga x̃ita chjinee kàtama ìt'aà ts'e kjoa xi ndaà t̃jín. Kò j̃nà kjoa xi ch'o t̃jín, kj'eè kiì na'ya-nò. 20 Jè Nainá xi tsjá-ná kjoa'nchán, tà chibaá chja-là nga ya s̃iik̃ijnangui ndsokoò jè x̃ita neíí mé-ne nga koma k̃inchanè. K̃jondaà-là Na'èn-ná Jesucristo kàt̃ijnakò-nò.

21 T̃ís̃ihixat'aà-nò jè Timoteo xi taña ñixákjoò-jen, kò Lucio, kò Jasón kò Sosípater j̃nà xi x̃ita xinguiáa ma.

22 'An xi Tercio mì-na, xi t̃ikjìl-nò xojon jè, ìt'aà ts'e Na'èn-ná, s̃ihixat'aà-nò.

23 T̃ikoa t̃ís̃ihixat'aà-nò Gayo; 'an ìí t̃ijñaa ì ñi'ya-là nga t̃ikoa ìí bixoña ngats'ìi x̃ita naxandá-là Cristo.

Tísíhixat'aà-nò Erasto x̄it̄a xi bítjò t̄on ts'e ni'ya osen; t̄ikoáá síhixat'aà-nò jè 'ndsee xi 'mì Cuarto.

²⁴ Ngats'ioò, jè kàt̄ijnak̄o-nò kj̄ondaà-la Jesu-cristo xi ot̄ixoma-ná.

'Én xi fehet'aà-ne

²⁵ Jeya kàt̄ijna jè Nainá xi t̄ijnak̄o-nò. Jè xi komà tsjá-nò nga'ñó t̄ikoá komà kixi s̄ilkítsajna-nò koni tsò 'én ndaà-la Nainá xi 'an okoòya-nò k̄o j̄nà 'én xi nokjoàyaj̄īn-nò it'aà ts'e Na'èn-ná Jesucristo. Nga jyeé tí'ya-la kjoa xi t̄j̄i'ma-la Nainá skanda sa kj̄otsee; ²⁶ tanga i'ndēi jye ki'ya-la koni s'ín t̄íchja Xojon-la Nainá xi kisk̄ī j̄nà x̄it̄a xi kīichja ngajo-la Nainá kj̄otsee. K'oaá s'ín t̄íchja kj̄ot̄ixoma-la Nainá xi t̄ijna n̄it̄a mé n̄achr̄ein-nè. Jè kjoa'ma-la Nainá, jye kis'enoj̄m̄i yije-la ngats'īi x̄it̄a n̄axandá xi t̄j̄in nga t̄j̄tsa isò'nde mé-ne nga k̄at̄asíkitasòn-ne koni s'ín mokjeīin-la.

²⁷ Jè Nainá xi t̄ajngoò ma-ne, xi t̄j̄in-la kjoach̄j̄ine, k̄atas'e-la kjoa jeya it'aà ts'e Jesucristo n̄it̄a mé n̄achr̄ein-ne. K'oa's'ín k̄atama.

'Én-lā Nainá xi kjoa ts'e Jesucristo
New Testament in Mazatec, San Jerónimo Tecóatl
Mazateco de S Jeronimo Tecoatl; maa
(MX:maa:Mazatec, San Jerónimo Tecóatl)

copyright © 2013 Wycliffe Bible Translators, Inc.

Language: Mazatec, San Jerónimo Tecóatl

Translation by: Wycliffe Bible Translators, Inc.

Mazateco, San Jerónimo Tecóatl [maa], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, San Jerónimo Tecóatl

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

9f778253-d34e-5037-af35-7bca16479aa0